

萬 有 文 庫

第 二 集 七 百 種

王 雲 五 主 編

大 方 廣 佛 華 嚴 經

( 六 )

實 叉 難 陀 譯

澄 觀 撰 述

商 務 印 書 館 發 行

大方廣佛華嚴經

(六)

實叉難陀譯

澄觀撰述

國學基本叢書

# 大方廣佛華嚴經疏鈔會本卷七

爾時妙燄海天王承佛威力普觀一切自在天衆而說偈言。

疏二上首說偈中二先彰說儀後明正說今初燄海是當衆上首仰承佛力爲衆申心十地論云承佛力者顯無我慢普觀十方示無偏心今觀已衆通局小異耳鈔十地論云承佛力等者論中但云示無我慢無偏心故昔人或將通配二句疏意以別配爲正故便配之。

疏然頌總有四種一名阿耨鞞婆頌此不問長行與偈但數字滿三十二卽爲一偈二名伽陀此云諷頌或名不頌頌不頌長行故或名直頌謂直以偈說法故三名祇夜此云應頌四名纏馱南此云集施頌謂以少言攝集多義施他誦持故今此卽伽陀頌也下皆准之爲何意故經多立頌略有八義一少字攝多義故二諸讚歎者多以偈頌故三爲鈍根重說故四爲後來之徒故五隨意樂故六易受持故七增明前說故八長行未說故今此正唯前二義兼五六。

疏二正說中十偈次第各一法門結集取此以爲長行非此頌前也然此中長行與偈有多不同謂偈字則定長行多少不同而長行則約天得法偈中卽是歎佛此必然也若二文互望或因果之殊或體用有別或互相影略或難易更陳或法喻不同或能所遞舉故傳授者善消息之二文相暎於義易了鈔結集取此者以昔人皆云頌長行故然此中長行下相對料揀者示說偈儀然上舉四種明偈體式次明八義卽立偈之由然通重頌及與孤起華藏品有十例五對唯約祇夜今此料揀唯局此文雖

是孤起。而經家廣列。故須會釋。總有六對。一因果者。如第十偈云。佛於無邊大劫海。爲衆生故求菩提。此舉因故。長行卽云。自所悟處。此顯果也。第二體用者。第二偈云。能然照世妙法燈。用也。長行云。普觀一切悉自在。體也。第三影略者。長行云。知一切法。不生不滅。不來不去。偈中但云。了相無有。卽偈略也。第四偈云。永滅衆生癡暗心。長行但有現見一切法。卽長行略也。第四難易者。如初天王。長行但云。得法界虛空界寂靜。方便力解脫。不見偈文。難爲解釋。第五法喻不同者。長行第二。但云。觀一切法。偈云。能然照世妙法燈。是也。第六能所遞舉者。初天王但云。法界虛空界。是所徧處。偈中則云。佛身徧徧諸大會。則長行闕能徧。且就初段。具有六對。況下諸段。顯文甚多。言傳授者善消息之者。易豐卦云。天地盈虛。與時消息。釋云。消者盡也。息者生也。謂可加則加。可減則減。可出則出。可沒則沒。故云消息。二文相映者。長行不了。則觀偈文。偈文難見。則觀長行。則易了也。

佛身普徧諸大會。充滿法界無窮盡。寂滅無性不可取。爲救世間而出現。

疏今初。天中初二句。卽前所徧法界虛空。兼明能徧佛身。則十身皆徧。無窮盡者。一出現無盡。若高山之出雲。二非滅盡法。猶虛空之常住。次句寂靜也。由無性故。不可取爲一異。俱不俱等。後句方便。合二爲力。此偈是說者自法。故不結天名下。並準知。鈔一出現無盡等者。然還源觀說有三徧。一塵普周法界徧。卽經充滿法界無窮盡。二一塵出生無盡徧。卽疏前意。三一塵含容空有徧。卽疏後意。不可取爲一異等者。普徧諸會。此應有異。充滿法界。此應唯一。今性相俱寂。故皆叵得。若有一異。則合此爲俱。一異既亡。俱從何有。若有俱句。遣此雙非。俱句已無。雙非寧立。故四句皆遣。百非俱亡。寂乎唯寂。而



言等者亦不可說有無等四。真應等殊。唯證相應耳。

如來法王出世間。能然照世妙法燈。境界無邊亦無盡。此自在名之所證。

疏二中初句。是上自在。佛爲法王。於法自在。故次句觀也。第三句普也。後句結法屬人。爲他說故。然其結名義同法門。恐繁不配。他皆做此。

佛不思議離分別。了相十方無所有。爲世廣開清淨道。如是淨眼能觀見。

疏三中初句無功用也。不思議是標。離分別是釋。次句卽不生等。相卽生等。無卽不義。第三句卽行也。長行約要。先知法無生。方得成無功用。偈則要無分別。方能見法無生。內證與外用同時。所以二文前後。

如來智慧無邊際。一切世間莫能測。永滅衆生癡暗心。大慧入此深安住。

疏四中初句明廣。次句明深。卽上智慧海也。第三句自見法實。故能令物不迷事理。

如來功德不思議。衆生見者煩惱滅。普使世間獲安樂。不動自在天能見。

疏五中初句方便定也。次二句與安樂也。

衆生癡暗常迷覆。如來爲說寂靜法。是則照世智慧燈。妙眼能知此方便。

疏六中初句卽前癡暗。謂長迷妄境。鎮覆真心也。次句卽令觀寂靜。次句因滅無明。則熾然三菩提明。是前滅義。鈔因滅無明。則得熾然三菩提明者。卽涅槃二十一。南經十九。高貴德王菩薩品。因瑠璃光菩薩欲來放光。佛問文殊。文殊初入第一義。答云。世尊。如是光明。名爲智慧。智慧者卽是常住。常住

之法。無有因緣。云何佛問。何因緣。故有是光明。廣說無因緣。竟。末後云。世尊。亦有因緣。因滅無明。則得熾然。阿耨多羅三藐三菩提燈。今略義引耳。

如來清淨妙色身。普現十方。無有比。此身無性。無依處。善思惟天所觀察。

疏七中。初二句。即善入無邊境。無邊境。即所應處也。無有比。善也。次句。無性者。感而應故。無依者。思念寂故。由此能令物不造業。

如來音聲。無限礙。堪受化者。靡不聞。而佛寂然。恆不動。此樂智天之解脫。

疏八中。初二句。即普往十方說法。次一句。即不動無依。

寂靜解脫。天人主。十方無處不現前。光明照耀。滿世間。此無礙法。嚴幢見。

疏九中。初句。即入寂靜境。次二句。即普現光明。

佛於無邊大劫海。爲衆生故。求菩提。種種神通。化一切。名稱光天。悟斯法。

疏十中。初十一字。即無邊境爲所緣。求菩提。即自所悟處。次句。既緣其境。必起通化。前文略耳。復次。可愛樂法。光明幢天王。得普觀一切衆生根。爲說法。斷疑解脫門。

疏第二。明第四禪。廣果天。長行十法中。一。普觀等者。此應根授法。明於不知根說法。無果障中。得解脫也。斷疑生信。是說法果故。謂觀機識病。稱根說法。藥病無謬。故疑除疾愈。

淨莊嚴海。天王。得隨憶念。令見佛解脫門。

疏二中。隨憶念言。略有二意。一。隨念何佛。如名應之。二。隨念有淺深。令見佛有蘊妙。此於現身得解脫。

也。

最勝慧光明天王得法性平等無所依莊嚴身解脫門。

疏三中法性平等者。唯一味也。無所依者。離能所也。莊嚴身者。證真莊嚴。卽非莊嚴故。雖現世間。還如法性不依諸有。此於有依得解脫也。

自在智慧幢天王得了知一切世間法。一念中安立不思議莊嚴海解脫門。

疏四中知世間法者。謂衆生世間心法各異。知已隨宜現通說法。故云安立。一念速安。非人天外道所能思議。以此莊嚴如來教海。此於安立教法遲鈍障得解脫也。

樂寂靜天王得於一毛孔現不思議佛刹無障礙解脫門。

疏五。一毛等者。約偈不思議解脫力也。無礙有二義。一唯就所現。則毛中多刹。自互無礙。二雙就能所。一毛不大。而多刹不小。一多大小皆無礙也。又由無大小相故。此於取著障得解脫。

普智眼天王得入普門觀察法界解脫門。

疏六。普門者。一門攝一切門。名爲普門。隨一一門。各全收法界。故於其中觀察法界。深智契達。故名爲入。此於隨相中得解脫。

樂旋慧天王得爲一切衆生種種出現無邊劫常現前解脫門。

疏七中衆生無邊。根器各異。應形說法。種種不同。旣根熟不休。故窮劫長現。此於畏苦不化生障得解脫。

善種慧光明天王得觀一切世間境界、入不思議法解脫門。

疏八中、觀一切等者、謂觀事入理、理超情表、云不思議、此於諸業報得解脫。

無垢寂靜光天王得示一切衆生出要法解脫門。

疏九中、法門無邊、出者爲要、根器萬品、故出要難思、此於著相得解脫。

廣大清淨光天王得觀察一切應化衆生、令入佛法解脫門。

疏十中、種種方便、但隨所應、終成種智、名入佛法、以大悲出現、皆等雨故、此於不欲利生得解脫、上云

出要、令離妄苦、今云入法、令得真樂也。

爾時可愛樂法光明幢天王、承佛威力、普觀一切少廣天、無量廣天、廣果天衆、而說頌言、

疏頌中、觀已衆內三類天者、上五淨居、非所被故、十偈次第、一如長行。

諸佛境界不思議、一切衆生莫能測、普令其心生信解、廣大意樂無窮盡。

疏初中、前二句、卽所疑境界、境界之言、通分齊所觀、普令者、觀根爲說故、生信解者、斷疑也、信佛大用、分齊難測、故斷佛上疑、生其正解、信佛所觀之境、則斷法上疑、亦生正解、謂如有疑云、爲存因果、非真空耶、爲是空故、無因果耶、今明只由真空能立因果、因果立故、乃是真空也、第四句、釋一切之言、佛以利生爲意樂故、旣該一切、故廣大無盡、鈔只由真空能立因果下、答上疑念、此句明其以有空義故、一切法得成、若無有空義、因果定有、便墮於常、言因果立故、乃是真空者、卽因緣故、空義若離因果、以

明空者是斷空故。

若有衆生堪受法。佛威神力開導彼。令其恆觀佛現前。嚴海天王如是見。

疏二中初句。卽憶念。次二句。令見佛。

一切法性無所依。佛現世間亦如是。普於諸有無依處。此義勝智能觀察。

疏三中初句。卽法性平等無依。次二句。卽莊嚴身。謂如法性爲嚴。故無依處。

隨諸衆生心所欲。佛神通力皆能現。各各差別不思議。此智幢王解脫海。

疏四中初一句。卽了一切世間。次二句。卽一念安立。不思議莊嚴海。

過去所有諸國土。一毛孔中皆示現。此是諸佛大神通。愛樂寂靜能宣說。

疏五中初二句。卽毛孔現刹。上云不思議佛刹。但以橫多。今云過去。乃豎窮前際。皆云現者。如鏡現像。

次一句。是無障礙。令應度者見。卽佛神通。依佛鏡智而觀。乃法性恆耳。

一切法門無盡海。同會一法道場中。如是法性佛所說。智眼能明此方便。

疏六中初二句。卽普門。次一句。卽法界。末句。義兼於入。

十方所有諸國土。悉在其中而說法。佛身無去亦無來。愛樂慧旋之境界。

疏七中初二句。卽爲一切衆生種種出現。次句。卽無邊劫常現前。謂約機隱顯。佛無去來。故常現也。

佛觀世法如光影。入彼甚深幽奧處。說諸法性常寂然。善種思惟能見此。

疏八中初句。卽觀一切世間也。次二句。卽入不思議法也。若約理論深。是深非甚。今不壞事而卽理。故

曰甚深。全攬理以成事。名爲幽奧處。兼上二法。常寂然。釋上義也。以諸法卽寂故。不可以理事思也。



佛善了知諸境界。隨衆生根雨法。雨爲啓難思出要門。此寂靜天能悟入。

疏九中初二句。示一切衆生。次一句。顯出要法。

世尊恆以大慈悲利益衆生而出現。等雨法雨充其器。清淨光天能演說。

疏十中初二句。卽觀應化衆生。次句。令入佛法。

復次清淨慧名稱天王。得了達一切衆生解脫道方便解脫門。

疏第三明三禪長行十法。第一門卽寂普現名爲方便。說卽是道。由說入佛解脫海故。此於體用有礙得解脫也。又方便言亦通入解脫之方便也。

最勝見天王得隨一切諸天衆所樂如光影普示現解脫門。

疏第二門隨一切等者。謂不能普現得解脫也。光影之言。略有二釋。一謂因光發影。影但似質。而不似光。依智現形。形隨衆樂。不隨自智。隨樂卽應。名普示現。二水中之月亦名光影。謂佛月不來。影現心水。影多似月。少似於水。謂水動則流光蕩漾。水濁則似晦魄臨池。若止而且清。則圓璧皎皎。此亦隨自他意也。此就天王且隨天衆所樂。偈就於佛無不應也。鈔光影之言。略有二者。賢首更有一義。今不存之。故云略也。彼釋云。謂如明淨物。得日光耀於屋壁上。有光影現。如來應機現身亦爾。然有多義。一緣集義。謂大智明淨悲願日照於衆生陰室之內。現於佛影。二速疾義。無遠不至。故三無礙義。不可執持。故四有用義。能破暗故。五無生義。無所有故。廣如十忍品說。此義似有穿鑿。故略不存。今疏所明二影者。然攝論影略有三一。映質影。二水月影。三鏡像影。廣如十忍品。今是前二。今言光影。故略鏡像。正是

初義謂日喻如來。身樹等形質。以喻衆生。日無異體。質有萬差。樹側影邪。形端影正。影不現日內。但在質邊。弄影多端。隨心萬品。二、水月影。以月有光。亦名光影。影多似月者。如月圓缺。故少似水者。隨動靜故。

寂靜德天王得普嚴淨一切佛境界。大方便解脫門。

疏第三門佛境界有二。一、如如法性。是佛證境。二十方國土。是佛化境。嚴淨亦二。離相息妄。則嚴如境。萬行迴向。則嚴化境。此二無礙。大方便也。此於無巧莊嚴得解脫也。

須彌音天王得隨諸衆生永流轉生死海解脫門。

疏第四隨諸衆生等者。謂大悲深厚。故隨入生死。衆生無邊。故永流轉而示導也。此於無大悲捨衆生障得解脫也。

淨念眼天王得憶念如來調伏衆生行解脫門。

疏第五門佛調衆生。或折或攝。或兼二行。雖悲願多門。皆令趣無上道。若憶念此。居然受化。不滯於權。此於勝所緣有忘念障得解脫。鈔或折攝等者。勝鬘云。應攝受者。而攝受之。應折伏者。而折伏之。攝受折伏。則正法久住。

可愛樂普照天王得普門陀羅尼海所流出解脫門。

疏第六得普門等者。佛以稱法性之總持。包攝一切總持。故云普門。復能流演無盡。故得稱海。此於聞思有忘失障得解脫也。

世間自在主天王得能令衆生值佛生信藏解脫門。

疏第七門謂佛出難值引之令值信心難生勸之令生信含衆德所以名藏下經云信爲寶藏第一財故此於嫉妬邪見障得解脫也。

光燄自在天王得能令一切衆生聞法信喜而出離解脫門。

疏第八能令等者上令信佛此令信法仰依卽信領解便喜信可趣入喜則奉行因得解脫名而出離此於迷覆衆生障出離道得解脫。

樂思惟法變化天王得入一切菩薩調伏行如虛空無邊無盡解脫門。

疏第九門謂衆生界法界調伏界虛空界皆無邊無盡菩薩悲智以方便界開示法界行調伏界等虛空界於有限礙障中得解脫故。鈔謂衆生界等者瑜伽有五無量界此前列四後言以方便界者卽調伏方便界故五具矣。

變化幢天王得觀衆生無量煩惱普悲智解脫門。

疏第十觀衆生等者由悲故憐愍由智故觀察觀察煩惱知病行已化而度之此於無悲無方便障得解脫也。

星宿音妙莊嚴天王得放光現佛三輪攝化解脫門。

依藏補

爾時清淨慧名稱天王承佛威力普觀一切少淨天無量淨天徧淨天衆而說頌言。

疏頌中十一頌初十次第如前長行依梵本列名中此長行闕第十一天彼名星宿音妙莊嚴天王下

言妙音者略而未廻。

了知法性無礙者。普現十方無量刹。說佛境界不思議。令衆同歸解脫海。疏第一頌中初二句。是了達方便。依法性而現故。後二句。說卽是道。說不思議解脫。令衆同歸。

如來處世無所依。譬如光影現衆國。法性究竟無生起。此勝見王所入門。

疏二中初二句。明光影普現。無依故如影。第三句。成上二義。以無生故如影。無依略不明。隨天所樂。

無量劫海修方便。普淨十方諸國土。法界如如常不動。寂靜德天之所悟。

疏三中初句。標方便。無量劫修。兼顯大義。次二句。正明方便嚴佛境界。

衆生愚癡所覆障。昏暗恆居生死中。如來示以清淨道。此須彌音之解脫。

疏四中初二句。卽衆生永流轉。謂無明所盲。覆本淨心。造業受身。故恆居生死。次句。卽隨而示之。

諸佛所行無上道。一切衆生莫能測。示以種種方便門。淨眼諦觀能悉了。

疏五中總相頌佛調生行。初句高。次句深。後句廣。

如來恆以總持門。譬如刹海微塵數。示教衆生徧一切。普照天王此能入。

疏六中初二句。卽普門陀羅尼。次一句。卽所流出。示教者。示其善惡。教使修行。稱性無徧。故徧而無盡。

如來出世甚難值。無量劫海時一遇。能令衆生生信解。此自在天之所得。

疏七中初二句。值佛。次句。生信。藏不信。則佛難值。正信。唯佛能生。旣值佛。生信。反覆相成。今之一遇。何

得不信。

佛說法性皆無性。甚深廣大不思議。普使衆生淨信。光燄天王能善了。

疏八中初二句。卽所聞之法。以無性爲法之眞性。次句。卽令衆生信喜出離。淨則出不信濁。成無漏故。三世如來功德滿。化衆生界不思議。於彼思惟生慶悅。如是樂法能開演。

疏九中初句。能調伏人。前因此果耳。化衆生界。卽調伏行。無邊無盡。爲不思議。思惟悅生。是名爲入。衆生沒在煩惱海。愚癡見濁。甚可怖。大師哀愍。令永離。此化幢王所觀境。

疏十中初二句。卽衆生無量煩惱。謂利鈍二使。愛見羅刹。皆甚可怖也。次一句。以悲愍之。以智令離。鈔愛見羅刹。甚可怖畏者。卽涅槃第十一已如前引。

如來恆放大光明。一一光中無量佛。各各現化衆生事。此妙音天所入門。

疏十一中。旣闕長行。對名略顯。初二句。星宿莊嚴義也。謂佛光流於法界。燦若星羅。次句。卽妙音莊嚴。化衆生事。不出三輪。上云妙音。舉一立稱耳。若長行立名。應云得放光現佛三輪攝化解脫門。

復次。可愛樂光明天王。得恆受寂靜樂。而能降現銷滅世間苦解脫門。

疏第四二禪。長行十法。初中二義。一內證眞樂。經論共說樂有五種。謂一因。二果。三苦對除。四斷受。五無惱害。無惱害樂。更有四種。謂出家遠離樂。禪定適悅樂。菩提覺法樂。涅槃寂靜樂。今當第四。若通取受字。兼禪定。菩提則含因果。言恆受者。以無所受。受諸受故。若待境界。卽非恆也。二而能降下。外建大義。降神現相。除苦因果。此於涅槃體用障得解脫也。鈔經論共說樂有五種等者。論卽瑜伽等經。卽善戒經。第二自利利他品經云。云何名快樂。快樂義者有五種。一者因樂。二者受樂。三者斷受樂。四者



遠離樂。五者菩提樂。云何因樂。因內外觸。因觸因緣。故有受樂。是名因樂。因行善法。得他世樂。是名因樂。云何受樂。從因因緣。身得增長。心得安隱。是名受樂。受樂者有二種。何等爲二。一者有漏。二者無漏。無漏有二。一者學地。二者無學。有漏有三。欲界色界無色界。三有內外入。故有六觸。六觸有二。一者身樂。二者心樂。五識共行。名爲身樂。意識共行。名爲心樂。修習聖道。斷諸受故。道得增長。無有諸受。名斷受樂。永斷煩惱。身心無患。名遠離樂。受常樂故。名菩提樂。或有說言。無想定者。名爲斷樂。是義不然。何以故。不斷受樂故。遠離樂者有四種。一者出家樂。二者寂靜樂。三者斷樂。四者菩提樂。世間之人。多有憂苦。永斷是苦。名出家樂。斷欲界貪。名寂靜樂。永斷煩惱。名爲斷樂。受常樂故。名菩提樂。菩薩常能施衆生樂。名菩提樂。菩薩摩訶薩。自受常樂。轉施衆生。名菩提樂。何故名爲因樂。是樂因故。名爲因樂。不名受樂。受樂者。不名因樂。名爲性樂。斷樂者。不名因樂。不名受樂。以斷多樂故。名爲斷樂。遠離樂者。不名因樂。不名受樂。不名斷樂。以觀生死衆過患故。名智慧樂。菩提樂者。不名因樂。不名受樂。不名斷樂。不名遠離樂。無邊常故。名菩提樂。名無勝樂。名無邊樂。名無上樂。亦名常樂。名寂靜樂。菩薩摩訶薩。能以如是五種之樂。施於衆生。是名因樂義。今疏望彼經。數名不同。若欲會者。果及苦對除。卽是受樂。開出無惱害者。卽遠離樂。及菩提樂。經中遠離有四。今云出家遠離樂。含其二種。出家卽第一遠離。兼得第三斷樂。復開菩提。爲菩提涅槃。二樂。若瑜伽九十六說。樂有二種。一者欲樂。二遠離。遠離復有三種。一劣。謂無所有。已下。二中。謂第一有三勝。謂滅受定。然世尊依第一義。說有三種。最寂靜樂。謂等解脫故。總攝爲三。一應遠離。二應修習。卽前三上中下遠離。名有上遠離。三最極究竟解脫。無上住樂。卽

前貪等解。

清淨妙光天王。得大悲心相應。海一切衆生喜樂藏解脫門。

疏第二門。謂無緣大悲。與性海相應。拔世憂患。故出生喜樂。無盡名藏。此於惱害心得解脫。自在音天王。得一念中普現無邊劫一切衆生福德力解脫門。

疏三。一念等者。修福德因。感依正果。福之力也。雖多人多劫所感。念劫融之頓現。此於時劫得解脫也。最勝念智天王。得普使成住壞一切世間皆悉如虛空清淨解脫門。

疏第四門。謂以佛力不動成住壞三。皆如空劫。常清淨也。此於遷變得解脫也。

可愛樂淨妙音天王。得愛樂信受一切聖人法解脫門。

疏五。愛樂等者。謂信樂佛菩薩法。敬奉修行。則二障得解脫也。

善思惟音天王。得能經劫住演說一切地義及方便解脫門。

疏第六門。地謂地智。義謂清淨。卽離念超心地也。方便者。教導及入地之由。入住出等也。以無盡辨演無盡法。故能經劫。

演莊嚴音天王。得一切菩薩從覲率天宮沒下生時。大供養方便解脫門。

疏七。一切等者。通有二義。一現多身。興多供。供多佛。皆稱真故。名大方便。卽長行意。二一念八相。徧法界故。名大方便。卽偈中意。於上自在。名爲解脫。

甚深光音天王。得觀察無盡神通智慧海解脫門。

疏八於定慧障得解脫。

廣大名稱天王。得一切佛功德海滿足。出現世間方便力解脫門。

疏九果滿應機。是於現身化生無堪任性得解脫。

最勝淨光天王。得如來往昔誓願力發生深信愛樂藏解脫門。

疏十見佛大願雲。愛樂隨學。此於自輕障得解脫。

爾時可愛樂光明天王。承佛威力。普觀一切少光天。無量光天。極光天衆。而說頌言。

疏二頌中十偈。次第依前。

我念如來昔所行。承事供養無邊佛。如本信心清淨業。以佛威神今悉見。

疏今初前三句。明寂靜樂。通舉因樂。以顯果樂。後句降現之用。

佛身無相離衆垢。恆住慈悲哀愍地。世間憂患悉使除。此是妙光之解脫。

疏二中初句。卽所相應海。次句。卽能應大悲。大悲荷物。故名爲地。次句。卽生喜藏。憂除故喜。患除故樂。

佛法廣大無涯際。一切刹海於中現。如其成壞各不同。自在音天解脫力。

疏三中初句。能現。次句。所現。

佛神通力無與等。普現十方廣大刹。悉令嚴淨常現前。勝念解脫之方便。

疏四中初二句。卽普使成住等。次一句。頌如虛空清淨。以三灾彌綸。而淨土不毀故。然三四二偈。似如

前卻。且順文釋耳。

如諸刹海微塵數。所有如來咸敬奉。聞法離染不唐捐。此妙音天法門用。  
疏五中、初二句、咸敬奉。是愛樂。餘是聖人。次一句、卽上法及信受也。

佛於無量大劫海。說地方便無倫匹。所說無邊無有窮。善思音天知此義。  
疏六中、初句經劫住。次二句卽地義。方便無邊。是一切也。

如來神變無量門。一念現於一切處。降神成道大方便。此莊嚴音之解脫。  
疏七中、通頌八相普周。略無供養。

威力所持能演說。及現諸佛神通事。隨其根欲悉令淨。此光音天解脫門。  
疏八中、初句是前智慧。次句神通。次句無盡。及海。以隨根令淨。是深廣故。

如來智慧無邊際。世中無等無所著。慈心應物普現前。廣大名天悟斯道。  
疏九中、初二句、卽德海滿足。次句、出現世間。

佛昔修習菩提行。供養十方一切佛。一一佛所發誓心。最勝光聞大歡喜。

疏十中、三句通明前昔誓願力。第四句結中、便顯深信愛樂藏。以文云大歡喜故。

# 大方廣佛華嚴經疏鈔會本卷八

復次尸棄梵王得普住十方道場中說法而所行清淨無染著解脫門。

疏第五初禪長行十法中一普住等者大用應機故普徧說法用而常寂故行淨無染得心無行故行淨了境無相故無染。

慧光梵王得使一切衆生入禪三昧住解脫門。

疏二佛爲定境住定則所見深故。

善思慧光明梵王得普入一切不思議法解脫門。

疏三普入等者法海難量名不思議一言演盡名爲普入。

普雲音梵王得入諸佛一切音聲海解脫門。

疏四圓音隨類名音聲海要無分別方入佛聲。

觀世音自在梵王得能憶念菩薩教化一切衆生方便解脫門。

疏五能憶等者化生卽是趣菩提行故以宿住智明記。

寂靜光明眼梵王得現一切世間業報相各差別解脫門。

疏六衆生報異隨業有差佛示現受令生正信。

普光明梵王得隨一切衆生品類差別皆現前調伏解脫門。



疏七、於法自在。方能隨類調生。

變化音梵王。得住一切法清淨相寂滅行境界解脫門。

疏八、佛身無相等法性之清淨。現而同化。爲寂滅之行矣。

光耀眼梵王。得於一切有無所著。無邊際。無依止。常出現解脫門。

疏九、不著諸有。故能常現三業無邊。更無可依。

悅意海音梵王。得常思惟觀察無盡法解脫門。

疏十、觀性無相。猶如虛空。何有可盡。察用隨宜。如擊水文。隨擊隨生。復何可盡。

爾時尸棄大梵王。承佛威力。普觀一切梵身。天。梵輔天。梵衆天。大梵天衆。而說頌言。

疏偈中。先上首觀衆。開成四天。合則梵身卽衆。亦有經云。梵衆梵身。梵輔梵眷。屬身卽是衆。輔卽眷屬。

佛身清淨常寂滅。光明照耀徧世間。無相無行無影像。譬如空雲如是見。

疏十偈。初中初句。法身普徧道場。次句。智光說法。次句。行淨無染。境相智行。旣亡。則大用影像亦寂。後

句。通以喻顯。雲不離空。空不礙雲。以況寂用。

佛身如是定境界。一切衆生莫能測。示彼難思方便門。此慧光王之所悟。

疏二中。初二句。入禪之境。如來法身。卽是心性。若能觀之。爲上定故。次句。示入方便。雖多。同入一寂。

佛刹微塵法門海。一言演說盡無餘。如是劫海演不窮。善思慧光之解脫。

疏三中。初句。卽不思議法。次二句。明普人義。以一言說盡故。一言說盡之辨。劫海亦不能窮。顯法無盡。

也。約能包。則一言說盡。約能久。則劫海莫窮。然一言但說剎塵。未是無盡。設欲一言盡者。則二三兩句相違。一言說盡。劫海更何所演。而得無窮。更有所演。前則不盡。又不可重說。若欲通者。總望則可說盡。隱映重重。則不可盡。如擊水。文小擊大。擊徧擊。各隨文生。盡未來際。擊盡未來文生。爲難思法也。鈔以一言說盡。故者釋此。一偈疏文有二。一正釋。二解妨。前中自有二意。一佛法對說。前句一言說盡。顯佛勝德。後句劫說不窮。明法無盡。約能包下。總就佛說是歎佛故。前二句能包。後一句能久。然一言但說剎塵下。通妨。謂有問云。前言說盡。後言不窮。豈不相違。答有二意。一順文通。二約理通。今初經云。佛刹微塵。法門海。一言演說盡無餘。剎塵法外。更有無盡之法。何妨劫海演說不窮。故反成之。設欲一言盡者。則二三兩句相違。初明前達於後。後更有所演下。後達於前。若欲通下。二約理會通。則前二句直是說盡一切諸法。後之一句。不妨無窮。若一言不盡者。佛非不思議故。故云總說則盡。成於前句。隱映無盡。成於後句。兼以喻顯。皆遺忘集意。

諸佛圓音等世間。衆生隨類各得解。而於音聲不分別。普音梵天如是悟。

疏四中。圓音之義。文略有三義。一廣無邊。二別詮表。三無分別。如次三句。餘如出現品辯。

三世所有諸如來。趣入菩提方便行。一切皆於佛身現。自在音天之解脫。

疏五中。初二句。卽教化衆生方便行。三世諸佛。皆以利他爲向。菩提自清淨業故。次句。前就梵王。故云憶念。今據如來。故身現耳。一毛尙現。何況全身。

一切衆生業差別。隨其因感種種殊。世間如是佛皆現。寂靜光天能悟入。

疏六中、初句業相差別。次句報相差別。次句現同世間。

無量法門皆自在。調伏衆生徧十方。亦不於中起分別。此是普光之境界。

疏七中、前二句、卽隨類調生。調法自在。故能隨類廣徧。次句顯明前義。無思成事故。

佛身如空不可盡。無相無礙徧十方。所有應現皆如化。變化音王悟斯道。

疏八中、初二句、明佛體性。卽前清淨寂滅。不可盡下。略顯四義如空。次句佛用應現爲行。旣皆如化。不

失寂滅。

如來身相無有邊。智慧音聲亦如是。處世現形無所著。光耀天王入此門。

疏九中、初二句、所見無有邊。次句、勤觀無依著。

法王安處妙法宮。法身光明無不照。法性無比無諸相。此海音王之解脫。

疏十中、初二句、常思大用無盡。謂安住大悲宮。能現大事故。次句、常觀法體無盡。

復次、自在天王得現前成熟無量衆生自在藏解脫門。

疏自下、第二欲界諸天文有七段。第一他化天王長行十法中、一、謂現衆生前自在調伏。使其成熟。化

法無盡。故名爲藏。

善目主天王得觀察一切衆生樂令入聖境界樂解脫門。

疏二、觀世樂相皆苦。故應捨。觀世樂性。卽入聖樂。

妙寶幢冠天王得隨諸衆生種種欲解令起行解脫門。

疏三、隨樂斷疑。令起正行。

勇猛慧天王。得普攝爲一切衆生所說義解脫門。

疏四、一言普攝諸義。徧於時處。爲物而說。

妙音句天王。得憶念如來廣大慈增進。自所行解脫門。

疏五、做佛修慈。

妙光幢天王。得示現大悲門。摧滅一切憍慢幢解脫門。

疏六、示現等者。大悲十力。摧彼慢高。而無摧心。故云示現。

寂靜境天王。得調伏一切世間瞋害心解脫門。

疏七、以智慧光照諸世間。令離三毒之闇。則無惡趣之果。瞋癡障重。故與偈互陳。

妙輪莊嚴幢天王。得十方無邊佛隨憶念。悉來赴解脫門。

疏八、十方等者。爲念佛三昧純熟故。隨念何佛。卽能得見。如休捨解脫等。

華光慧天王。得隨衆生心。念普現成正覺解脫門。

疏九、應念現成。

因陀羅妙光天王。得普入一切世間大威力自在法解脫門。

疏十、普入等者。寂用自在。現世調生。總名威力。

爾時自在天王。承佛威力。普觀一切自在天衆。而說頌言。

佛身周徧等法界。普應衆生悉現前。種種教門常化誘。於法自在能開悟。

疏偈中亦十初中。初句體徧。次句用周。故能現前。次句教藏能成。後句所成自在。開於法藏。悟深法門。卽成熟也。

世間所有種種樂。聖寂滅樂爲最勝。住於廣大法性中。妙眼天王觀見此。

疏二中。初二句二樂。次句令入。

如來出現徧十方。普應羣心而說法。一切疑念皆除斷。此妙幢冠解脫門。諸佛徧世演妙音。無量劫中所說法。能以一言咸說盡。勇猛慧天之解脫。

疏三四可知。

世間所有廣大慈。不及如來一毫分。佛慈如空不可盡。此妙音天之所得。

疏五中。三句共顯如來大慈。初二句舉劣顯勝。次句以喻正顯。謂世慈有相。若須彌之高。大海之廣。終可傾盡。佛慈稱性。若芥子之空。投刃之地。卽不可盡。又如空有。普覆常攝。廣容無礙。難壞無盡。略舉一無盡耳。鈔芥子之空者。卽四十一經云。佛子。譬如虛空。於蟲所食。芥子孔中。亦不減小。於無數世界中。亦不增廣。其諸佛身。亦復如是。見大之時。亦無所增。見小之時。亦無所減。今但取能喻。投刃之地者。卽莊子中。庖丁爲文惠君解牛。十九年而刀刃若新。發於矟。君問其故。答云。臣始見牛。爲全牛也。今見非全牛。彼節者有間。而刀刃者無厚。以無厚入有間。恢恢乎其於遊刃。必有餘地矣。故文選云。投刃皆虛。目牛無全。今借其骨間小空。以對上小空。爲真俗之況耳。



一切衆生慢高山。十力摧殄悉無餘。此是如來大悲用。妙光幢王所行道。  
慧光清淨滿世間。若有見者除癡暗。令其遠離諸惡道。寂靜天王悟斯法。  
毛孔光明能演說。等衆生數諸佛名。隨其所樂悉得聞。此妙輪幢之解脫。  
疏六、七、與八、文亦可知。

如來自在不可量。法界虛空悉充滿。一切衆會皆明觀。此解脫門華慧入。  
疏九中初二句。明佛體普遍無成不成。次句。隨衆生心現成正覺。

無量無邊大劫海。普現十方而說法。未曾見佛有去來。此妙光天之所悟。

疏十中。普現十方。卽普入一切世間。餘皆威力自在。鈔餘皆威力自在者。大集經云。孩子以啼爲力。女人以瞋爲力。外道以見爲力。波旬以生死爲力。菩薩以慈悲爲力。佛以智慧爲力。故以說法皆爲威力。

復次善化天王。得開示一切業變化力解脫門。

疏第二化樂天。長行十一法中。一爲物開示諸業如化。化雖體虛。而有作用爲力。業亦從緣無性。而報不忘。

寂靜音光明天王。得捨離一切攀緣解脫門。

疏二捨離等者。攀取緣慮。是惑病之本。若心境無得。則捨攀緣。鈔攀取緣慮。是惑病之本者。卽淨名問疾品經云。何謂病本。謂有攀緣。何所攀緣。謂之三界。云何斷攀緣。以無所得。若無所得。則無攀緣。何

謂無所得。謂離二見。何謂二見。謂內見外見。是無所得。故今疏云。心境無得。卽捨攀緣。變化力光明天王。得普滅一切衆生癡暗心。令智慧圓滿解脫門。

疏三、闡滅智生。如月盈缺。

莊嚴主天王。得示現無邊悅意聲解脫門。

疏四、示現等者。梵聲微妙。故云悅意。應徧十方。故云無邊。

念光天王。得了知一切佛無盡福德相解脫門。

疏五、知一切等者。此有三義。一、福德之相。有十蓮華藏世界微塵數。故無有盡。二、謂清淨慈門等。無限因所生故。一一因果。皆稱真故。一一卽無有盡。皆同虛空。三、大慈悲行。是福德相。使盲聾視聽等。皆慈善根力故。涅槃經中有聞讚佛爲大福德。怒云。生經七日。母便命終。豈謂大福德相。讚者云。年志俱盛。而不卒暴。打之不瞋。罵之不報。是故我言大福德相。怒者聞而心伏。故慈爲無盡福相。然與前義相成。鈔涅槃經中有聞讚佛等者。卽三十八經。南經三十五。諸婆羅門。欲與佛拗力。爾時復有一婆羅門。作如是言。瞿曇沙門。成就具足無量功德。汝等不應與諍。大衆答言。癡人。云何說言沙門瞿曇。有大功德。其生七日。母便命終。是何得名福德相耶。婆羅門言。罵時不瞋。打時不報。當知卽是大福德相。其身具有三十二相。八十種好。無量神通。是故當知是福德相。心無憍慢。先意問訊。言語柔軟。初無鬻獠。年志俱盛。心不卒暴。王國多財。無所愛戀。捨之出家。如棄涕唾。是故我說沙門瞿曇。成就具足無量功德。大衆答言。善哉。仁者。瞿曇沙門。實如所說。成就無量神通變化。我不應與彼拗試。是事釋曰。文甚昭著。

今但義引略不引相好者。前已有故。然與前義相成者。第二義慈爲相因。此義慈卽是相果。果由因致。復能顯因。故云相成。

最上雲。晉天王得普知過去一切劫成壞次第解脫門。

疏六。三達圓智了三世劫。此就天王且言宿住耳。

勝光天王得開悟一切衆生智解脫門。

疏七。開悟等者。此門缺偈。上下文中屢有開悟。卽同法華開示悟入。以開攝示。以悟攝入。謂開示約能化。悟入約所化。鈔以開攝示等者。此有二釋。前卽嘉祥意。四句雖殊。不出能所。開示約能化。悟入約所化。全彼疏文。彼更釋云。能化有大開之與曲示。所化有始悟之與終入。意云。但說有性。名爲大開。言此是凡夫性。此是聖人性。因果理行。卽名曲示。豁然了知。故名爲悟。修行契證。目之爲入。卽始淺終深。下引論意。卽初深終淺。以入約因故。疏彼論云。開者無上義。謂除一切智智。更無餘事。卽雙開菩提涅槃。謂以知見之性爲涅槃。知見之相爲菩提。衆生本有障翳不現。佛爲開除。則本智顯。故示者同義。三乘同法身故。悟者不知義。不知唯一實事。故今令知。成報身菩提故。入者令證不退轉地故。卽是因義。爲證初地已上。爲菩提涅槃因故。廣如彼釋。鈔彼論二下。卽第二釋。彼論先釋如來知見云。佛知見者。如來能證。如實知彼義故。疏意云。如實卽法性。是所證也。知彼義。卽能證大智也。能所知見。皆名知見。正同今經開示正覺境界。正覺卽能證境界。卽所證。今疏但出開等四句。開者無上義。論標名也。除一切智智。更無餘事者。釋所開卽一切智智。一切智是根本智。重言智者。是後得智。根本名知。後得

名見。除此二事。更無有餘能勝過此。故名無上。卽雙開菩提涅槃者。釋所開一切智智也。謂以知見之性下。釋雙開意。衆生本有下。疏釋開義。大乘法師釋開云。開者出生顯證之義。謂出生菩提。顯證涅槃。故卽法相宗意。故下釋悟云。令悟知見相本有種子。以成報身。今疏意不然。知見性相。並皆本有。本有大智光明。徧照法界義。故涅槃云。佛性名第一義空。知見性也。第一義空。名爲智慧。知見相也。在因爲性相。在果爲菩提涅槃。故云衆生本有。障翳不現耳。智障菩提。惑障涅槃。二障俱無。菩提涅槃一時俱顯。故云佛爲開除。卽本智顯現。示者同義。別示知見之性。以成涅槃。悟者不知義。別示知見之相。以成菩提。言不知唯一實事者。經云。唯此一事實。餘二則非真。一實事。卽是知見。上三皆果。斷德智德。以總別故。而成三句。入卽因義。未知何可能證。故示與無量智業。無量智者。卽果中一切智智體用。而言業者。是彼因也。所以要舉初地。已上爲因者。登地證如。爲涅槃因。能證地智。爲菩提因。故十地論釋經究竟如虛空。盡未來際。云。卽因善決定究竟如虛空。卽菩提因。如依空生色。色不盡故。盡未來際。爲涅槃因。常果無窮。故二果卽智性相也。又開者卽般若。故論云。除一切智智。更無餘事。示卽法身。悟卽解脫。三德涅槃。卽是三句。入是三德之因。上有三意。一約佛性釋。二約菩提涅槃釋。三約三德涅槃釋。會之並同。佛性有果。有果果。卽菩提涅槃。故三德涅槃攝菩提故。亦佛性故。餘如前後釋。禪宗之解。如問明品。

妙警天王。得舒光疾滿十方虛空界解脫門。

疏八。稱性之光。有何難徧。

喜慧天王得一切所作無能壞精進力解脫門。

疏九、一切等者。謂契理具修。長劫無倦。故衆魔外道。所不能摧。

華光髻天王得知一切衆生業所受報解脫門。

疏十、善惡等殊。苦樂等異。皆知性相。

普見十方天王得示現不思議衆生形類差別解脫門。

疏十一、示現等者。無邊品類。一毛頓現。更無來去。尤顯難思。

爾時善化天王承佛威力。普觀一切善化天衆。而說頌言。

疏偈中脫於第七。唯有十偈。

世間業性不思議。佛爲羣迷悉開示。巧說因緣真實理。一切衆生差別業。

疏初中。初句總。次句開示。後二句顯如化力差別業者。果不亡故。

種種觀佛無所有。十方求覓不可得。法身示現無真實。此法寂音之所見。

疏二中。初句所攀緣。後二無得。然緣境有二。一真。二妄。真佛有緣。亦成妄惑。況於妄耶。種種觀者。五求

不得。故謂佛有耶。常見爲惑。謂佛無耶。邪見深厚。四句百非。所不能加。故無所有。非唯一佛。十方亦然。

應化示現。非真實故。求實無得。卽見真身。真卽無緣。佛尙應捨。何況餘境。鈔五求不得等者。卽是中

論觀如來品偈云。非陰不離陰。此彼不相在。如來不有陰。何處有如來。卽五求也。由諸外道妄計有我。

我爲如來。計有五故。一謂卽陰是如來。二謂離陰有如來。三謂如來中有陰。四謂陰中有如來。五謂陰

能有如來。今並非之。若陰卽如來。陰生滅故。佛應生滅。故云非也。二、若謂離陰有如來者。以何相知。如來墮常過。離陰生滅故。故云不離。三、若謂如來中有陰。如器中有果。則亦是異。如來亦墮常過。四、若陰中有如來。如牀上有人。亦有別異過。故云此彼不相在。五、若如來能有五陰。陰屬如來者。則如人有子。亦有別異過。異則如來墮常等故。然後四句。皆成異過。初卽是一。總合但是一異過耳。故觀法品破我。但言若我是五陰。我卽爲生滅。若我異五陰。卽非五陰相。今細推尋。故有五求皆不可得上之五求。但能破有。今四句並非。故言謂佛有耶。常見爲惑。謂佛無耶。邪見深厚。此且雙破有無。而有過則微。無過則重。故云深厚。彼論偈云。邪見深厚者。則說無如來。如來寂滅相。分別有亦非。如是性空中。思惟亦不可者。亦遣有無。四句百非所不能加。故無所有者。結歸經文。准中論中略說三種四句。皆不能加。初偈云。空則不可說。非空不可說。共不共。叵說。但以假名說。此一四句。共卽俱句。不共則雙遮。若別說者。一空。二非空。三亦空。亦非空。四非空。非非空。此皆雙遮。辨中第二四句云。寂滅相中。無常無常等四。第三四句云。寂滅相中。無邊無邊等四。今並拂之。非唯此四。泛爾隨相。皆悉非之。然百非有二義。一約十惡說。如下當明二約通相說。謂離一切分別之相耳。故論結云。如來過戲論。而人生戲論。戲論破慧眼。是皆不見佛。謂起心動念。並爲戲論。非觀如來。應如淨名觀阿閼品。故疏結云。真則無緣。佛尙應捨。何況餘境。卽借用金剛法尙應捨。何況非法。

佛於劫海修諸行。爲滅世間癡暗惑。是故清淨最照明。此是力光心所悟。世間所有妙音聲。無有能比如來音。佛以一音徧十方。入此解脫莊嚴主。

疏三四可知。

世間所有衆福力。不與如來一相等。如來福德同虛空。此念光天所觀見。

疏五中。初二句福德相。次句無盡相。相好者。經云。盡人中福。不及一天。乃至云。盡世間福。不及如來一相等。鈔相好經云。盡人中福等者。等取善生經云。一切世間福。不及如來一毛功德。一切毛功德。不

及一好。一切好功德。不及一相。故名福相。云不及如來一相等。等取瑜伽四十九。亦如是說。

三世所有無量劫。如其成敗種種相。佛一毛孔皆能現。最上雲音所了知。

疏六中。約天之智普知。約佛一毛能現。○七闕。

十方虛空可知量。佛毛孔量不可得。如是無礙不思議。妙髻天王已能悟。

疏八中。初二句。明毛孔過空。謂靈智證理。非如虛空。眞理超事。故亦非比。無限理智。不可分析。隨其少分。卽融攝重重。故一毛之量。便越虛空。次句別示越相。謂毛孔不大而無涯。卽廣陲無礙。故杜絕思議之境。前卽一光外展。今則一毛內廣。文綺互耳。一毛本自徧空。十方豈得難滿。鈔毛孔過空。疏有三段。說二種過。一。如來靈智能證眞理。虛空不能證。二。如來稱眞之理空。超過事空。事空卽斷滅空。故三。無限理智下。雙結上二。皆不可分。理無分限。智契於理。亦無分限。智結靈智。理結眞理。旣不可分。一毛稱眞。則重重融攝。此處之空。豈不能攝於餘處之空。

佛於曩世無量劫。具修廣大波羅密。勤行精進無厭怠。喜慧能知此法門。

疏九中。初句。長時修。次句。無餘修。次句。無間修。具此三修。故進力難壞。而言廣大波羅密者。至第五經

釋。

業性因緣不可思。佛爲世間皆演說法。性本淨無諸垢。此是華光之入處。

疏十中。初句總顯業之性相。卽緣生果報之不二。便是無性之非有。故不可有無思也。次句佛如是說。天如是知。次句以法性示業性。

汝應觀佛一毛孔。一切衆生悉在中。彼亦不來亦不去。此普見王之所了。

疏十一中。初二句小一現大多。爲一難思。次句現時不來。不現不去。又難思也。

復次知足天王。得一切佛出興世圓滿教輪解脫門。

疏第三。知足天長行十法中。第一天得總相法門。諸佛將興。皆生彼天下。生之時。普應法界。頓闡華嚴。爲圓滿相。

喜樂海髻天王。得盡虛空界清淨光明身解脫門。

疏二。盡虛空等者。光明色身。皆徧空界。了不可取。故云清淨。

最勝功德幢天王。得消滅世間苦淨願海解脫門。

疏三。以淨願力。滅惑業苦。

寂靜光天王。得普現身說法解脫門。

善目天王。得普淨一切衆生解脫門。

疏四五可知。



寶峯月天王得普化世間常現前無盡藏解脫門。

疏六、普化等者。普卽無偏。常卽無間。示其眞樂。卽如來藏。

勇健力天王得開示一切佛正覺境界解脫門。

疏七、自覺智境。佛已入之。故示物同悟故。

金剛妙光天王得堅固一切衆生菩提心。令不可壞解脫門。

疏八、以淨福堅菩提心。

星宿幢天王得一切佛出興咸親近。觀察調伏衆生方便解脫門。

疏九、謂仰觀下化。

妙莊嚴天王得一念悉知衆生心。隨機應現解脫門。

疏十、卽照現速疾也。



# 大方廣佛華嚴經疏鈔會本卷九

爾時知足天王承佛威力普觀一切知足天衆而說頌言。

如來廣大徧法界於諸衆生悉平等普應羣情闡妙門令入難思清淨法。

疏偈中初偈前半卽出世義上句體智俱徧下句悲用皆普後半卽圓滿教輪前句卽實之權爲妙門後句會權入實爲圓滿。

佛身普現於十方無著無礙不可取種種色像世咸見此喜髻天之所入。

疏二中可知。

如來往昔修諸行清淨大願深如海一切佛法皆令滿勝德能知此方便。

疏三中初二句以行淨願次句雜染本空故前令滅佛法本具故今令滿安盡真顯二言相成。

如來法身不思議如影分形等法界處處闡明一切法寂靜光天解脫門。

疏四中初二句依體普現若月入百川尋影之月月體不分卽體之用用彌法界體用交徹故不思議。

次句稱根說法鈔尋影之月月體不分者此中法喻影略若具更云以月隨影萬流異見尋用之體。

體本寂然爲寂靜光也。

衆生業惑所纏覆憍慢放逸心馳蕩如來爲說寂靜法善日照知心喜慶。

疏五中前半卽所淨之衆生具三雜染故於中上句標下句略示惑相慢是根本憍逸隨惑憍謂染自。

盛事慢謂恃己陵他。放逸卽是縱蕩。憍爲染法所依。慢能長淪生死。放逸衆惑之本。故偏舉此三蕩者。動也。謂境風鼓擊。飄蕩馳散。次句能淨法門。謂不取於相。當體寂故。鈔慢是根本等者。六根本中之一也。憍逸隨惑者。二十隨煩惱中之二也。憍是小隨。放逸是大隨。並如初發心品。今略釋之。以經有意。故慢謂已下。釋三惑相。以順經文。故唯識云。慢謂恃己凌他。高舉爲性。能障不慢。生苦爲業。謂若有慢。於彼有德。心不謙下。由此生死輪轉無窮。受諸苦故。故疏云。慢能長淪生死。論云。云何爲憍。於自盛事。深生染著。醉傲爲性。能障不憍。染依爲業。故疏云。憍爲染法所依。論云。云何放逸。謂於染淨品。不能防修。縱蕩爲性。障不放逸。增惡損善。所依爲業。故疏云。放逸卽是縱蕩。餘可思準。

一切世間真導師。爲救爲歸而出現。普示衆生安樂處。峯月於此能深入。諸佛境界不思議。一切法界皆周徧。入於諸法到彼岸。勇慧見此生歡喜。若有衆生堪受化。聞佛功德趣菩提。令住福海常清淨。妙光於此能觀察。疏六七及八文並可知。

十方刹海微塵數。一切佛所皆往集。恭敬供養聽聞法。此莊嚴幢之所見。疏九中。通顯上旣親近。必當敬養聞法。以聞調他爲眞供養。列名中云。星宿幢。今故莊嚴與長行互出。衆生心海不思議。無住無動無依處。佛於一念皆明見。妙莊嚴天斯善了。

疏十中。前半所知衆生心。上句標深廣。下句顯相念慮不住多於草。故廣也。深者有三義。一恆轉如流。故不住。二本體寂然。故不動。三從緣妄起。無別所依。次句卽一念悉知。

復次時分天王得發起一切衆生善根令永離憂惱解脫門。

疏第四時分天十法一善根若發憂惱自除。

妙光天王得普入一切境界解脫門。

疏二以無限方便普證法身之境。

無盡慧功德幢天王得滅除一切患大悲輪解脫門。

疏三悲摧惑苦故名爲輪。

善化端嚴天王得了知三世一切衆生心解脫門。

疏四以三達智知機授法。

總持大光明天王得陀羅尼門光明憶持一切法無忘失解脫門。

疏五陀羅尼等者總持入理故名爲門以慧爲體故云光明若取助伴則兼念定念卽明記故能憶持。

定乃心一常無忘失四無礙等一切諸法皆是所持。

不思議慧天王得善入一切業自性不思議方便解脫門。

疏六可知。

輪囿天王得轉法輪成熟衆生方便解脫門。

疏七轉法等者轉法示菩提之道卽是成熟衆生方便。

光燄天王得廣大眼普觀衆生而往調伏解脫門。

疏八、十眼圓見。隨宜往調。

光照天王。得超出一切業障。不隨魔所作解脫門。

疏九、超出等者。超出業障。使離惡因。不隨魔作捨惡緣也。

普觀察大名稱天王。得善誘誨一切諸天衆。令受行心清淨解脫門。

疏十、等雨法雨。誘令進善。使彼受行。誨令斷惡。得心清淨。此就於天。偈通一切。

爾時時分天王。承佛威力。普觀一切時分天衆。而說頌言。

疏偈中亦十。

佛於無量久遠劫。已竭世間憂惱海。廣闢離塵清淨道。永耀衆生智慧燈。

初偈通顯。前半彰已已離。後半開發能離善根。

如來法身甚廣大。十方邊際不可得。一切方便無限量。妙光明天智能入。  
生老病死憂悲苦。逼迫世間無暫歇。大師哀愍誓悉除。無盡慧光能覺了。  
佛如幻智無所礙。於三世法悉明達。普入衆生心行中。此善化天之境界。  
總持邊際不可得。辨才大海亦無盡。能轉清淨妙法輪。此是大光之解脫。  
疏二三四五文並可知。

業性廣大無窮盡。智慧覺了善開示。一切方便不思議。如是慧天之所入。

疏六中。初句卽業性言廣大者。一念造一切故。無窮盡者。未得對治。無能止故。有多門故。次句善入智。

了自入。開示令他入。次句入門多種。

轉不思議妙法輪。顯示修習菩提道。永滅一切衆生苦。此是輪齋方便地。如來真身本無二。應物隨形滿世間。衆生各見在其前。此是餒天之境界。

疏七八亦可知。

若有衆生一見佛。必使淨除諸業障。離諸魔業永無餘。光照天王所行道。

疏九中。初句見佛爲緣。次二見佛二益。一正智生。必內超業障。二佛爲真導。豈外逐魔緣。既不隨魔。安造魔業。十魔並離。故致諸言。鈔十魔並離者。卽五十八經。一蘊魔。二煩惱。三業。四心。五死。六天。七善根。八三昧。九善知識。十菩提法智。下廣有釋。

一切衆會廣大海。佛在其中最威耀。普雨法雨潤衆生。此解脫門名稱入。

疏十亦可知。

復次釋迦因陀羅天王。得憶念三世佛出興。乃至刹成壞。皆明見大歡喜解脫門。

疏第五。三十三天衆。長行有十一法。初中承力故憶念。念過去佛者。曾入此天故。三世有二。一亦念未來。二過去。自互相望。亦有三世。生大喜者。境殊勝故。慶自福故。

普稱滿音天王。得能令佛色身最清淨廣大。世無能比解脫門。

疏二能令等者。然佛身無染淨大小。亦無勝劣。猶若虛空。雲屯卽暗。日朗卽明。色昏卽劣。物隔言小。今妄雲盡而智光照。故清淨性空現。故廣大。妙色顯。故無比。皆解脫力。故曰能令。

慈目寶髻天王得慈雲普覆解脫門。

疏三大慈不揀冤親若雲無心而普覆。

寶光幢名稱天王得恆見佛於一切世主前現種種形相威德身解脫門。

疏四恆見等者人天世主多恃威德故佛現超之令其敬喜。

發生喜樂髻天王得知一切衆生城邑宮殿從何福業生解脫門。

疏五知其因果差別使物勤修因果並得名福。

端正念天王得開示諸佛成熟衆生事解脫門。

疏六開示等者示佛調生令菩薩做習。

高勝音天王得知一切世間成壞劫轉變相解脫門。

疏七初成後壞住時轉變乃至毛孔細刹皆悉知之言轉變者福人出世則琳琅現矣薄福者出則荆

棘生焉。

成就念天王得憶念當來菩薩調伏衆生行解脫門。

疏八憶念等者佛毛現因調行天憶則能思齊。

淨華光天王得了知一切諸天快樂因解脫門。

疏九一切諸樂以佛爲因具勝德故就樂增勝說諸天耳。

智日眼天王得開示一切諸天子受生善根俾無癡惑解脫門。



疏十、開示等者。受生善根。卽念佛力。開示令不迷惑。則去放逸而進修。

自在光明天王。得開悟一切諸天衆。令永斷種種疑解脫門。

疏十一、疑自疑他、疑理、疑事。有各種種。如聞空疑斷。聞有疑常。聞雙是。則疑其兩分。聞雙非。疑無所據。又聞空疑有。聞有疑空等。互相疑也。今開之使悟。鈔疑自疑他等者。然疑有二。一、通相說於諸諦理。猶豫爲性。能障不疑善品爲業。二者、五蓋中疑。略有三種。一、疑自。謂己不能入理。二、疑師。爲彼不能善教。三、疑法。謂於所學。爲令出離。爲不出離。如有病人。疑自疑醫。疑藥。病終不愈。今言疑自疑他。疑理。疑事。卽五蓋中之三種也。合其事理。皆所疑法。通相說也。如聞空疑斷者。略示疑理事之相。亦通一切疑也。疏有二勢。一、當句生疑。謂聞空疑斷等。不了真空。將謂斷滅等。二、又聞空疑有者。卽空有互疑。而云等者。等取聞雙是。則疑雙非。聞雙非。則疑兩是。今開之可思。更略示其義。謂聞空莫疑斷。是卽事之空。非斷滅故。聞有莫疑常。非定性有。從緣有故。聞雙是莫疑兩分。但雙照二諦。無二體故。聞雙非莫疑無據。以但遮過。令不著故。又聞空莫疑於有。是卽有之空故。聞有莫疑於空。是卽空之有故。聞雙是莫疑雙非。是卽非有無爲有無故。聞雙非莫疑雙是。是卽有無方是非有無故。

爾時釋迦因陀羅天王。承佛威力。普觀一切三十三天衆。而說頌言。

疏偈中。亦有十一。

我念三世一切佛。所有境界悉平等。如其國土壤與成。以佛威神皆得見。

疏初中。云平等者。化儀同故。又但以世俗文字數故。說有三世。非謂如來有去來今。鈔又但以世俗

下。卽淨名第二。唯改菩提。爲如來耳。

佛身廣大徧十方。妙色無比利羣生。光明照耀靡不及。此道普稱能觀見。

疏二中。初句廣大。次句無比。次句清淨。然古德明通有六義。一廣。謂總法界爲身故。二徧。全徧一塵。至十方故。三妙。色卽無色。無色之色故。四勝。無有比故。五益。利物無涯故。六用。光破暗故。

如來方便大慈海。往劫修行極清淨。化導衆生無有邊。寶髻天王斯悟了。

疏三中。前半卽慈雲。上句果大。下句因深。一切佛法依慈悲。慈悲又依方便立。俱稱深廣。故致海言。次句卽普覆也。

我念法王功德海。世中最上無與等。發生廣大歡喜心。此寶光天之解脫。佛知衆生善業海。種種勝因生大福。皆令顯現無有餘。此喜髻天之所見。諸佛出現於十方。普徧一切世間中。觀衆生心示調伏。正念天王悟斯道。如來智身廣大眼。世界徼塵無不見。如是普徧於十方。此雲音天之解脫。一切佛子菩提行。如來悉現毛孔中。如其無量皆具足。此念天王所明見。世間所有安樂事。一切皆由佛出生。如來功德勝無等。此解脫處華王入。疏次六可知。

若念如來少功德。乃至一念心專仰。諸惡道怖悉永除。智眼於此能深悟。

疏十中。初二句卽前善根。少功德者。以少況多。彰因爲勝。次句卽人天受生。故離三惡怖。

寂滅法中大神通。普應羣心。靡不周。所有疑惑。皆令斷。此光明王之所得。  
疏十一中。初句。卽能開之法。是寂滅智通。次二句。由普應。故疑皆斷也。

復次日。天子得淨光普照十方衆生。盡未來劫。常爲利益解脫門。

疏第六日。天長行十一法。旣爲日天。多辨光益。初一名及法門。皆是總也。謂佛身智光。猶如彼日。無私而照。是曰淨光。此光體也。次辨用光。略有四義。一約心。高下齊明。故名普照。二約處。則窮十方界。三約時。盡於未來。四約功用。常無間斷。如斯利益。卽大智之功。

光燄眼。天子得以一切隨類身。開悟衆生。令入智慧海解脫門。

疏二。以一切等者。衆生本有佛智。如海潛流。今佛以隨彼彼類身。設種種方便。務在開悟。令其證入。須彌光歡喜幢。天子得爲一切衆生主。令勤修無邊淨功德。解脫門。

疏三。衆生愛染。漂泊無依。佛德無礙。應爲其主。隨修絕染。名淨功德。一行契理。卽曰無邊。況其具修耶。淨寶月。天子得修一切苦行。深心歡喜解脫門。

疏四。修一切等者。以智導悲。爲物受苦。故深歡喜。

勇猛不退轉。天子得無礙光普照。令一切衆生。益其精爽。解脫門。

疏五。謂體離障惑。用而遂通。故云無礙。若身若智。俱得稱光。周而不偏。故云普照。身心明利。是益精爽。爽。明也。大集經云。國王護法。增長三種精氣。一地精氣。謂五穀豐熟。二衆生精氣。謂形貌端嚴。無諸疾疫。三善法精氣。謂修施戒信等。今文正在第三。益其福智。義兼前二。法力遠資。故。

妙華纓光明天子得淨光普照衆生身令生歡喜信解海解脫門。

疏六淨光等者身智二光淨物身心信解深廣于何不喜。

最勝幢光明天子得光明普照一切世間令成辦種種妙功德解脫門。

疏七晝則勤心修善業故。

寶髻普光明天子得大悲海現無邊境界種種色相寶解脫門。

疏八大悲海等者謂無緣大悲坐於道樹出多奇寶故色相寶者應言寶色相圓明可貴故以寶爲體。

寶莊嚴故具十蓮華藏塵數故云種種一一色相用周法界名現無邊境如是皆從大悲海流悲海包

納不揀賢愚故。

光明眼天子得淨治一切衆生眼令見法界藏解脫門。

疏九慧除癡翳法眼則淨淨見法界法界卽藏藏如前說。

持德天子得發生清淨相續心令不失壞解脫門。

疏十發生等者謂於佛所發生清淨心曾一供養能令其福續至菩提故如出現品食金剛喻況相續

耶。

普運行光明天子得普運日宮殿照十方一切衆生令成就所作業解脫門。

疏十一使物居業莫越日光令人進德寧過法義。

爾時日天子承佛威力普觀一切日天子衆而說頌言。

疏偈中亦有十一。

如來廣大智慧光。普照十方諸國土。一切衆生咸見佛。種種調伏多方便。

疏初中。前半淨光普照。後半常爲利益。滅惡生善。破愚爲智等。爲多方便。

如來色相無有邊。隨其所樂悉現身。普爲世間開智海。燄眼如是觀於佛。

佛身無等無有比。光明照耀徧十方。超過一切最無上。如是法門歡喜得。

疏二三可知。

爲利世間修苦行。往來諸有無量劫。光明徧淨如虛空。寶月能知此方便。

疏四中。前半卽一切苦行。此有四難。一、背己利世難。二、行相唯苦難。三、處經諸有難。四、時劫無量難。於

此具行。故云一切。次句明深心歡喜。亦有四義。一、爲物苦行。滿本願故。義在初句。二、智照苦性。本空寂

故。卽有光明照空。三、徧淨無染。非雜毒故。卽徧淨如空。四、自他有果。非無利故。卽第三句全。

佛演妙音無障礙。普徧十方諸國土。以法滋味益羣生。勇猛能知此方便。

放光明網不思議。普淨一切諸含識。悉使發生深信解。此華纓天所入門。

疏五六可知。光網之義。如賢首品。

世間所有諸光明。不及佛一毛孔光。佛光如是不思議。此勝幢光之解脫。

疏七中。通明舉劣顯勝。以辨難思。故能成辦諸妙功德。言世不及者。世雖多光。益非究竟。佛光雖少。必

徹眞源。不可盡故。以一況諸。

一切諸佛法如是。悉坐菩提樹王下。令非道者住於道。寶髻光明如是見。衆生盲暗愚癡苦。佛欲令其生淨眼。是故爲然智慧燈。善目於此深觀察。解脫方便自在尊。若有曾見一供養。悉使修行至於果。此是德天方便力。

疏八九與十文亦可知。

一法門中無量門。無量千劫如是說。所演法門廣大義。普運光天之所了。

疏十一中。初句卽能照法門。猶一日宮。千光並照。隨舉一法。有無量門。然有二義。一約相類。如一無常門。有生老病死。聚散合離。得失成壞。三灾四相。外器內身。剎那一期。生滅轉變。染淨隱顯。皆無常門。餘亦如是。二就性融。不可盡也。次二句。普運照義。一日周天。則日日無盡。一門歷事。則劫劫難窮。方便多門。終歸一極。廣者無邊。大者無上。

復次月天子得淨光。普照法界。攝化衆生。解脫門。

疏第七月天。長行十法。初名法門。亦總稱也。謂光有身智二殊。法界亦事理兩別。事卽機之身心。及所依剎。身光照身。令覺。照剎令淨。智光照心。破癡。照理令顯。身智二光相卽。則所照四法亦融。以之稱普。並除惑障。俱得淨名。

華王髻光明天子。得觀察一切衆生界。令普入無邊法解脫門。

疏二觀察等者。悲心普觀。授以多法。令入無邊法界。

衆妙淨光天子。得了知一切衆生心海種種攀緣。轉解脫門。

疏三、衆生藏識皆名心海。前七轉識名攀緣轉轉。謂轉生亦流轉也。緣境非一立種種名。故經云藏識海常住。境界風所動。種種諸識浪騰躍而轉生。喻云洪波鼓溟壑。無有斷絕期。既知機殊。隨應授法。鈔故經云藏識海常住等者。此疏義引具云。譬如巨海浪。斯由猛風起。洪波鼓冥壑。無有斷絕期。藏識海常住等同。此義至問明品當廣分別耳。

安樂世間心天子得與一切衆生不可思議樂。令踊躍大歡喜解脫門。

疏四、與一切衆生等者。謂示物聖樂。令得初地。此樂本有。染而不染。爲不思議。

樹王眼光明天子得如田家作業。種芽莖等。隨時守護。令成就解脫門。

疏五、謂以菩提心爲家。二利爲作業。並以身口爲牛。利智爲犁。耕於心地。下聞薰種。生信解芽。起正行莖。開諸覺華。獲菩提果。自利則以不放逸。隨時守護。利他則以能化大願守護。不令魔惑禽獸侵犯。從因至果。得成就也。

出現淨光天子得慈悲救護一切衆生。令現見受苦受樂事解脫門。

疏六、慈悲等者。謂慈護現樂。悲救其苦。令見因果。斷惡修善。名真救護。

普遊不動光天子得能持清淨月。普現十方解脫門。

疏七、以佛智風持大悲月。使明見正覺。離苦清涼。

星宿王自在天子得開示一切法如幻如虛空。無相無自性解脫門。

疏八、開示等者。一切法有二種。一是所迷。謂緣起不實。故如幻。緣成故無性。二是能迷。謂徧計無物。故

如空。妄計故無相。又緣起法有二義。一無相如空。則蕩盡無所有。是相空也。二無自性如幻。則業果恆不失。卽性空也。此二不二。爲一緣起。是故兩喻共顯一法。既不迷能所。則悟真如。成正智火。鈔言此二不二者。融上性相二空也。云何融耶。謂若不達者。性相二空俱非了義。何者。謂法若性空。相不空。故若云相空。性又不空。以性相異。猶如晝火。無有熱性。而似火相。如木中火。不見其相。而有其性。如角峯垂頤。卽是牛相。負重致遠。是其性。故性主於內。相據於外。若一空者。彼一不空。若得意者。此二相成。謂由從緣無性。名爲性空。故令體相無不空寂。卽相空也。此以性空成於相空。由諸相蕩盡。是故空中無色。無受想行識。方顯法性本自空耳。此以相空成於性。故二空相成。云不二也。又說性空。總有三義。一法無定性。名空。則相未空。二法之真性本空。則相亦未空。三若說從緣無性。故名爲空。則一切法性自空矣。非推之使空。則悟真如。成正智火者。此中具五法。三自性。三性文顯。五法相者。謂徧計無物。故亡名也。妄計無相。絕妄想也。緣起無相。故亡相也。悟真如。卽圓成。成正智火。五法具矣。

淨覺月天子得普爲一切衆生起大業用解脫門。

疏九、悲願爲物。現相好形。是大業也。

大威德光明天子得普斷一切疑惑解脫門。

疏十、普斷等者。毛光普演。何疑不斷。

爾時月天子承佛威力。普觀一切月宮殿中諸天衆會。而說頌言。

疏偈中亦十。



佛放光明徧世間照耀十方諸國土。演不思議廣大法。永破衆生癡惑暗境。界無邊無有盡。於無量劫常開導種種自在化羣生。華鬘如是觀於佛。

疏初二可知。

衆生心海念念殊。佛智寬廣悉了知。普爲說法令歡喜。此妙光明之解脫。

疏三中。初句。卽心海攀緣轉。若以生滅八識。卽彼第八亦名爲轉。以恆轉故。云念念殊。恆故非斷。轉故非常。鈔若以生滅八識。卽彼第八亦名轉者。以起信中。則生滅與不生滅和合。故有藏識海常住之言。如長行辨。今取唯識宗八識。唯是業惑辨生。故皆生滅。言以恆轉故者。卽引證也。論釋第一能變。卽阿賴耶。於中因果法喻間之。恆轉如瀑流。論有問云。阿賴耶識爲斷爲常。論荅云。非斷非常。以恆轉故。恆。謂此識無始時來。一類相續。常無間斷。是界趣生施設本故。性堅持種。令不失故。轉。謂此識無始時來。念念生滅。前後變異。因滅果生。非常一故。可爲轉識。熏成種故。恆言遮斷。轉表非常。猶如瀑流。因果法爾。云念念殊者。卽以論恆轉之言。會同經文。

疏新新而生。念念而滅。念念殊故。體恆不卽。彼如來藏。功德常具。義亦不離。如彼瀑流。離水無流。離流無水。又如海波濤。有漂溺故。多畜養故。法合思之。次句。明了知。謂此識深細。唯佛智知故。次句。示心海性。卽是佛智。不令外求。稱機故喜。鈔新新已下。義引上論。念念殊故。下會法性宗。與如來藏非一非異故。起信云。謂不生不滅。與生滅和合。非一非異。名阿賴耶識。由念念殊。是生滅故。與藏非一。卽此生滅心。恆沙性德。本來具足。故名不離。不卽不離。卽不一不異。如彼瀑流者。卽向所引唯識後文云。如瀑

流水非斷非常相續長時有所漂溺。此識亦爾。從無始來。生滅相續。非常非斷。漂溺有情。令不出離。又如瀑流。雖因風等擊起諸波。而流不斷。此識亦爾。雖遇衆緣起眼等識。而恆相續。又如瀑流。漂水上下。魚草等物。隨流不捨。此識亦爾。與內習氣外觸等法。恆相續轉釋曰。但觀上引於疏文中。二宗合釋。如瀑流水。卽唯識文。離水無流通。二宗義。若成法相。離第八識。無眼等識。若依法性。離如來藏。無有八識。廣如問明。又如海波濤。卽起信云。如大海水。因風波動。水相風相。不相捨離。海卽藏識。如長行說。恆常住。故是如來藏。此卽成上離水無流。亦乃生下有所漂溺。卽唯識上生人天。猶如漂草。下沉三塗。猶如溺魚。多畜養故。又兼法性。此中具有恆沙性德。一切智寶。自此而生。若取法相。阿陀那識甚微細。一切種子如瀑流。我於凡愚不開演。恐彼分別執爲我。亦多畜養義。義兼二宗。言法合思之。已如上說。玄文又明。至問明品。當廣分別。二宗之異。謂此識微細。卽如向引偈文。卽唯識第三引解深密偈。次句示心海性。卽是佛智者。上句佛智爲能了故。八十經云。佛智廣大如虛空。悉了世間諸妄想故。今此卽出現品云。一切衆生。無不具有如來智慧。如大海水。潛流四天下。故云。卽是佛智。不令外求者。卽淨名云。諸佛解脫。當於衆生心行中求。稱彼圓機。故生歡喜。

衆生無有聖安樂。沉迷惡道受諸苦。如來示彼法性門。安樂思惟如是見。

疏四中。初二句。明失聖樂。聖安樂者。卽聖智涅槃。本有今無。故沉迷妄苦。次句。明與示其性有樂。非苦外。名不思議。見性得樂。性卽是門。鈔卽聖智涅槃。本有今無者。約法相說。涅槃本有。聖智本無。故無菩提覺法之樂。今約法性。涅槃聖智。皆有性淨。卽法性門。是則真樂本有。失而不知。云無有耳。故初地

云諸佛正法如是甚深而諸凡夫心墮邪見。既失真樂。妄苦本空。得而不覺。是故沉迷。若覺本性。不沉迷。故第三句示其性。有令其覺性。了彼苦性。真寂靜樂。云樂非苦外。是以長行名不思議。見性得樂。性即是門者。若約解苦無苦。苦爲見性之門。今約見性成佛。故性爲聖樂之門。

如來希有大慈悲。爲利衆生。入諸有。說法勸善。令成就。此目光天所了知。

疏五中。但是法說。如來卽田主也。悲佃物田。爲利入有。是所作業。爲利同於求果。入有似於耕犁。說法卽是下種。勸善正當守護。令熟可知。

世尊開闡法光明。分別世間諸業性。善惡所行無失壞。淨光見此生歡喜。

疏六中。前悲救護。語其本心。此明智光。彰其所用。悲智相導。能真救也。

佛爲一切福所依。譬如大地持宮室。巧示離憂安隱道。不動能知此方便。

疏七中。初句。佛爲福依。月爲涼本。次句。應言大風持宮。而今云爾。卽是轉喻。大地如佛。宮室如福。次句。

卽照現義。亦清涼義。

智火大明周法界。現形無數等衆生。普爲一切開真實。星宿天王悟斯道。

疏八中可知。

佛如虛空無自性。爲利衆生現世間。相好莊嚴如影像。淨覺天王如是見。

疏九中。初句。佛如虛空。大業性也。次句。大業體也。不利衆生。非大業故。次句。大業相。依光有影。可以知動靜。依鏡有像。可以辨妍媸。然彼影像。無自性相。如來相好。當知亦爾。鈔依光有影等者。疏開影像。

二字以爲兩喻影。謂光影喻像。謂鏡像喻。然此二喻有通一切。今取別義。光影之喻。喻佛現多端。故云有動靜質動影動質靜影靜鏡像喻現身勝劣。丈六三尺三十二相等。隨機見也。佛身毛孔普演音法雲覆世悉無餘。聽聞莫不生歡喜。如是解脫光天悟。

疏十亦可知。天衆竟。

# 大方廣佛華嚴經疏鈔會本卷十

復次持國乾闥婆王得自在方便攝一切衆生解脫門。

疏自下第二有八段。明八部四王衆。初四段皆初一是天。義如前釋。今初乾闥婆王。長行十法。初一卽東方天王。謂攝受折伏逆順多端。善巧應機。故名自在。

樹光乾闥婆王得普見一切功德莊嚴解脫門。

疏二普見等者。謂令衆生見佛一切功德莊嚴。佛一毛而爲利益。一一皆爾。故云普見。淨目乾闥婆王得永斷一切衆生憂苦出生歡喜藏解脫門。

疏三以慈愍方便除憂則喜生。憂苦旣如海廣深。喜樂亦難盡名藏。然則世之憂喜生乎利害。利害存乎情僞。苦樂存乎吉凶。吉凶存乎愛惡。愛惡盡則吉凶苦樂皆亡。情僞息則利害憂喜永斷。如此方爲永斷憂苦喜樂生焉。鈔然世之憂喜生乎利害下。上顯釋經文。此下密取經意。舉世憂喜。況此世樂。卽周易繫辭之文而倒用之。先具出易文。易云剛柔雜居而吉凶可見矣。變動以利言。注云變而通之。以盡利也。易云吉凶以情遷。注云吉凶無定。唯人所動。情順乘理以之吉。情逆違道以蹈凶。故曰吉凶以情遷也。易云是故愛惡相攻而吉凶生焉。卽今疏云吉凶存乎愛惡。則愛惡是吉凶之因也。易云遠近相取而悔吝生。情僞相感而利害生。卽今疏云憂喜存乎利害。利害存乎情僞。是則情僞爲利害因。故注云情以感物則得利。僞以感物則致害。則有憂喜。故利害是憂喜之因。故上易云遠近相取而悔

吝生意云相取相資也。順之則喜。逆之則憂。順卽利也。逆卽害也。又次易云。凡易之情。近而不相得則凶。或害之。悔且吝。今爲順易之次第。不順疏次。但曉易文。疏文自了。愛惡盡下。彰滅吉凶。憂喜所以易。雖無文。乃易本意。卽知無憂無喜。方爲大喜。無苦無樂。眞樂耳。

華冠乾闥婆王。得永斷一切衆生邪見惑解脫門。

疏四。永斷等。謂得佛決定智光。則邪惑永斷。

喜步普音乾闥婆王。得如雲廣布普蔭澤一切衆生解脫門。

疏五。謂慈雲普蔭。材與不材皆涼。慧澤廣霑。三草二木咸發。

鈔慈雲普蔭。材與不材皆涼等者。上句

依莊子。下句依法華。材者可爲棟梁。成器之木也。不材無所堪也。莊周行山。見伐木者。止其旁而不取。周歎曰。此木以不材得終其天年。及還至故人家。主人將殺雁。豎子曰。一能鳴。一不能鳴。請奚殺。主人曰。殺不能鳴者。弟子問周曰。山中之木。以不材得終天年。主人之雁。以不材致死。先生將何處焉。周笑對曰。將處夫材與不材之間。然材不材之言。雖在莊子。意亦法華第三云。我觀一切普皆平等。乃至云。貴踐上下。持戒毀戒。威儀具足。及不具足。正見邪見。利根鈍根。等雨法雨。而無懈倦。卽材與不材皆涼也。言三草者。謂小草。中草。上草。二木。謂小樹。大樹。以人天乘爲小草。經云。或處人天轉輪聖王。釋梵諸王。是小藥草。二乘爲中草。經云。知無漏法。能得涅槃。起六神通。及得三明。獨處山林。常行禪定。得緣覺證。是中藥草。菩薩爲上草。經云。求世尊處。我當作佛。行精進定。是上藥草。此通說大乘爲上。以大乘登地已上。慈蔭義廣。復加二樹。七地已前。小樹。經云。又諸佛子。專心佛道。常行慈悲。自知作佛。決定無疑。

是名小樹。八地已上爲大樹。經云。安住神通轉不退輪。度無量億百千衆生。如是菩薩。名爲大樹。而言  
咸發者。經云。佛平等說。如一味雨。隨衆生性。所受不同。如彼草木。所稟各異等。  
樂搖動美。目乾闥婆王。得現廣大妙好身。令一切獲安樂解脫門。

疏六。現廣等者。現身益物也。稱性普應。故廣大。具相清淨。故妙好。

妙音師子。幢乾闥婆王。得普散十方一切大名。稱寶解脫門。

疏七。佛出說法。是大名稱。佛法衆僧。俱稱爲寶。令此遠聞。義云普散。

普放寶光明。乾闥婆王。得現一切大歡喜。光明清淨。身解脫門。

疏八。現一切等者。身光普照。塵不能染。見者必歡。智光悅機。惑累不生。又歡喜也。故云大喜。

金剛樹華。幢乾闥婆王。得普滋榮。一切樹令見者歡喜。解脫門。

疏九。法水徧滋。菩提實行。行既樹立。見者必歡。無復二乘。一切皆菩提樹也。

普現莊嚴。乾闥婆王。得善入一切佛境界。與衆生安樂。解脫門。

疏十。善入等者。一多無礙。名爲佛境。天王智達。故云善入。

爾時持國乾闥婆王。承佛威力。普觀一切乾闥婆衆。而說頌言。

疏偈中亦十。

諸佛境界無量門。一切衆生莫能入。善逝如空性清淨。普爲世間開正道。  
如來一一毛孔中。功德大海皆充滿。一切世間咸利樂。此樹光王所能見。

世間廣大憂苦海。佛能消竭悉無餘。如來慈愍多方便。淨目於此能深解。十方刹海無有邊。佛以智光咸照曜。普使滌除邪惡見。此樹華王所入門。佛於往昔無量劫。修習大慈方便行。一切世間咸慰安。此道普音能悟入。疏前五可知。

佛身清淨皆樂見。能生世間無盡樂。解脫因果次第成。美目於斯善開示。

疏六中初句現身次一句。一切獲安樂也。世間卽一切也。無盡樂。總顯也。謂佛現於世。足履影覆。若在人天。現增快樂。若在下苦七日之中。身心安樂。乃至終獲涅槃之樂。故云無盡。鈔足履影覆。至身心快樂者。涅槃二十六說。如有怖鴿。至身子影中。猶自戰懼。至佛影中。坦然快樂。世尊履地去地四指。然當足下蟲。皆得生天。於是來所。種少善根。如食金剛。必至涅槃。

疏次句。別示出世因果之樂。先因後果。先世後出世。皆次第義。又總取偈意。佛身清淨。是解脫因。生無盡樂。是解脫果。鈔又總取偈意等者。上別配三句。竟今總取三句。釋因果次第成言。乃有五對因果。一取初句上四字爲因。第三句初二字是果。由佛身淨。令衆解脫故。二以第三句初解脫字爲因。第二句爲果。此是如來作用。解脫令衆生得樂故。上爲一對。

疏世無盡樂。又解脫因。能現淨身。又解脫果。鈔世無盡樂下三。以第二句爲因。第三句初解脫字爲果。以世樂爲因。出世解脫樂爲果故。四以第三句初解脫字爲因。第一句初四字爲果。佛證離障解脫。方能起於大用。而現身故。上卽第二對。



疏又佛身清淨是樂見因。樂見卽爲清淨身果。

鈔五、又佛身清淨下。唯就初句自分因果。上四字爲因。下三字爲果。由佛身淨。令物樂見。無有厭足。六、以下三字爲因。上四字爲果。由物樂見。自感淨身。又衆生若樂見。則淨身有果。若不樂見。則淨身無果。卽以利他爲果故。上卽第三對。

疏衆生樂見是安樂因。無盡安樂是樂見果。鈔七、衆生樂見下。以初句下三字爲因。第二句爲果。由樂見佛。天上人間常受安樂。八、第二句是因。初句下三字爲果。樂見若得樂。樂見卽有果。樂見若無樂。樂見便無果。上卽第四對。

疏無盡安樂是淨身因。能現淨業。是無盡果。鈔九、無盡安樂下。以第二句全爲因。以初句上四字爲果。由得無盡世樂故。終得清淨之身。此舉世尊因中修行之果。勸物亦然。十、能現淨業。是無盡果者。卽以第二句中下三字爲因。第一句上四字爲果。謂無盡樂。卽涅槃樂。安住涅槃。能建大事。方現淨身。是故淨身。是無盡樂果。故上釋云。終獲涅槃爲無盡樂。則無盡樂言。有其二種。一卽出世。如上所明。二連取一句。卽世無盡樂。如純陀施佛。果報無盡。應不成佛故。約世樂說無盡耳。

疏如是展轉因果。名次第成。鈔結云。如是展轉者。遞互相成故。

衆生迷惑常流轉。愚癡障蓋極堅密。如來爲說廣大法。師子幢王能演暢。

疏七中。初二句。寶所濟機。堅謂難壞。密謂無隙。間無空處。智不得生。次句正散寶也。如來普現妙色身。無量差別等衆生。種種方便照世間。普放寶光如是見。

疏八中結句應云。普放寶光如是見。而云妙音。譯者之誤。妙音屬前師子幢故。今依北藏改正。大智方便無量門。佛爲羣生普開闡。入勝菩提眞實行。此金剛幢善觀察。

疏九中初二句。法水普滋。次句。道樹普榮也。又方便多門。是開權也。入菩提行。是顯實也。種種方便。但爲一乘。是普滋也。

一刹那中百千劫。佛力能現無所動。等以安樂施羣生。此樂莊嚴之解脫。

疏十中初二句。佛境也。次句。安樂也。佛力能現無所動者。遮妄見也。非促多劫就一刹那。非展刹那受於多劫。本相如故名無所動。隨應度者。佛力令見。復次增長鳩槃荼王。得滅一切怨害力。解脫門。

疏第二鳩槃荼王。長行十法中。初卽南方天王。謂內惑外讐。皆名冤害。安住忍力。並能伏之。龍主鳩槃荼王。得修習無邊行門。海解脫門。

疏二修習等者。二利之行。趣果曰門。深廣難窮。名無邊海。

莊嚴幢鳩槃荼王。得知一切衆生心。所樂解脫門。

疏三。知其現欲。如應化伏。

饒益行鳩槃荼王。得普成就清淨大光明所作業。解脫門。

疏四。普成就等者。鈍識者現之以通利。智者示之以法。徧世多劫。名普成就。並如虛空。故云清淨。俱能照世。卽是光明三輪化生。是所作業。

可怖畏鳩槃荼王得開示一切衆生安隱無畏道解脫門。

疏五、世間惑苦可畏不安。菩提涅槃安隱無畏。萬行爲其因道。則畏滅果成矣。妙莊嚴鳩槃荼王得消竭一切衆生愛欲海解脫門。

疏六、消竭等者。愛欲漂流深廣如海。智日赫照。則妄竭眞明。

高峯慧鳩槃荼王得普現諸趣光明雲解脫門。

疏七、謂於諸趣普現身雲耀通明等之光也。

勇健臂鳩槃荼王得普放光明滅如山重障解脫門。

疏八、普放等者。身智光明遣除二障。

無邊淨華眼鳩槃荼王得開示不退轉大悲藏解脫門。

疏九、多劫修悲究竟滅苦爲不退轉。悲多方便。故復名藏。爲安衆生所以開示。

廣大面鳩槃荼王得普現諸趣流轉身解脫門。

疏十、普現等者。稱性神通。無來去而流轉。

爾時增長鳩槃荼王承佛威力。普觀一切鳩槃荼衆。而說頌言。

成就忍力世導師。爲物修行無量劫。永離世間憍慢惑。是故其身最嚴淨。

疏偈中初偈通顯。明佛已滅冤。冤之大者。莫越憍慢。有之則卑陋。滅之則端嚴。

佛昔普修諸行海。教化十方無量衆。種種方便利羣生。此解脫門龍主得。

佛以大智救衆生。莫不明了知其心。種種自在而調伏。嚴幘見此生歡喜。神通應現如光影。法輪真實同虛空。如是處世無央劫。此饒益王之所證。衆生癡翳常蒙惑。佛光照現安隱道。爲作救護令除苦。可畏能觀此法門。

疏次四偈可知。

欲海漂淪具衆苦。智光普照滅無餘。既除苦已爲說法。此妙莊嚴之所悟。

疏六中初句欲海欲爲苦本。云具衆苦。次二句消竭。既欲惡止。當說善行。

鈔欲爲苦本者。法華云。諸

苦所因。貪欲爲本。

佛身普應無不見。種種方便化羣生。音如雷震雨法雨。如是法門高慧入。

疏七中初句普現身雲。次句明等電光。故云種種。次句兼明雷雨。雷有二義。一遠震。二發生。謂蟄蟲發動。草木發萌。圓音之雷。可以思準。鈔次句明等電光者。下經云。通明無畏。以爲電光。謂十通。十明。十無畏等。皆稱電光。故云方便。圓音之雷。可以思準者。謂雷震百里。今周法界。二發生是標。云何爲發。吽着禪味。起大功用。是蟄蟲發動。云何爲生。令諸衆生。善根萌芽。未生令生。

清淨光明不唐發。若遇必令消重障。演佛功德無有邊。勇臂能明此深理。爲欲安樂諸衆生。修習大悲無量劫。種種方便除衆苦。如是淨華之所見。神通自在不思議。其身普現徧十方。而於一切無來去。此廣面王心所了。

疏餘三可知。

復次、毘樓博叉龍王得消滅一切諸龍趣熾然苦解脫門。

疏第三、龍王衆、準偈及梵本皆有十、前第一卷中長行脫第五、但有十法、今長行十一法、初一、卽西方天王法門、及第二、如偈當釋。

娑竭羅龍王得一念中轉自龍形、示現無量衆生身解脫門。

雲音幢龍王得於一切諸有趣中、以清淨音說佛無邊名號海解脫門。

疏三、與偈文通、有六義、一、諸趣是化處、二、淨音是化具、三、佛名是化法、四、神通是化本、五、衆生是化機、六、隨樂是化意。

餓口龍王得普現無邊佛世界建立差別解脫門。

疏四、普現等者、謂一毛普現無邊依正、以毛稱性、能廣容故、廣容卽是普徧、故能現之佛、還自住於毛孔所現刹中、能所無雜、依正區分、大小宛然、名建立差別。

餓龍王得一切衆生瞋癡蓋纏、如來慈愍令除滅解脫門。

疏五、靜法云、準梵本有餓龍王得一切衆生瞋癡蓋纏、如來慈愍令除滅解脫門、謂大慈居懷、則三毒俱滅。

雲幢龍王得開示一切衆生大喜樂福德海解脫門。

疏六、開示等者、佛大慈悲、是福德海、二資糧滿、然後得故、衆生慈福、卽是百川、佛毛示現、以表同體、既知同體、自然朝宗、因是悟入、故得大喜樂、鈔自然朝宗者、謂百川趣海、如萬國歸朝、禮云、春見日朝。

夏見曰宗。

德叉迦龍王。得以清淨救護音。滅除一切怖畏解脫門。

疏七、慈音智俱。故云清淨淨無貪愛。何畏何憂。

無邊步龍王。得示現一切佛色身及住劫次第解脫門。

疏八、示現等者。謂於身中現身土也。

清淨色速疾龍王。得出生一切衆生大愛樂歡喜海解脫門。

疏九、觀佛昔行深廣。故愛樂歡喜。海言通二。謂歡喜供養。

普行大音龍王。得示現一切平等悅意無礙音解脫門。

疏十、示現等者。謂爲衆演音。故云示現。音有四義。一、類多。謂一切。二、普遍。謂平等。三、稱根清雅。故云悅

意。四、一音隨類。故云無礙無礙。卽方便也。

無熱惱龍王。得以大悲普覆雲。滅一切世間苦解脫門。

疏十一、謂此無熱龍。住清涼池。出香美水。流注四海。導引百川。時布慈雲。降澍甘澤。是故能滅諸世間

苦。

爾時毘樓博叉龍王。承佛威力。普觀一切諸龍衆已。而說頌言。

汝觀如來法常爾。一切衆生咸利益。能以大慈哀愍力。拔彼畏塗淪墜者。

疏偈有十一。初中諸龍有四熱惱。名熾然苦。今並有治。一金翅所食苦。初句爲治。以觀佛法同三歸故。

二、行欲時復本身苦。三、鱗甲細蟲苦。並第二句爲治。學佛等利故。四、熱砂着身苦。後二句爲治。以不堪蟲癢熱砂中騷。今大悲哀愍。故能治之。有說四苦無鱗甲細蟲。而有風吹寶衣露身之苦。亦以第二句治之。就龍且說龍趣。末句約佛通拔畏塗。鈔諸龍皆有四種熱惱者。經論不同。然謗佛經說。如阿那婆達多龍王。三種過患皆悉遠離。一者熱砂不墮其頭。二者不以蛇身行欲。三者無迦樓羅鳥之畏。彼喻發菩提心。離三界惡。然會之亦同。無鱗甲細蟲而有風吹者。由有細蟲。故騷熱砂。此二則同。其風吹寶衣露身。卽見復本身之恥。所以互有開合。

一切衆生種種別。於一毛端皆示現。神通變化滿世間。娑竭如是觀於佛。  
疏二中。此就佛論示現。前約龍云能轉。又前一念時促。今一毛處小二文影略。餘九可知。但第五偈卽前所脫。

佛以神通無限量。廣演名號等衆生。隨其所樂普使聞。如是雲音能悟解。  
無量無邊國土衆。佛能令入一毛孔。如來安坐彼會中。此燄口龍之所見。  
一切衆生瞋恚心。纏蓋愚癡深若海。如來慈愍皆除滅。燄龍觀此能明見。  
一切衆生福德力。佛毛孔中皆顯現。現已令歸大福海。此高雲幢之所觀。  
佛身毛孔發智光。其光處處演妙音。衆生聞者除憂畏。德又迦龍悟斯道。  
三世一切諸如來。國土莊嚴劫次第。如是皆於佛身現。廣步見此神通力。  
我觀如來往昔行。供養一切諸佛海。於彼咸增喜樂心。此速疾龍之所入。

佛以方便隨類音爲衆說法令歡喜。其音清雅衆所悅。普行聞此心欣悟。衆生逼迫諸有中業惑漂轉無人救。佛以大悲令解脫。無熱大龍能悟此。復次毘沙門夜叉王得以無邊方便救護惡衆生解脫門。

疏第四夜叉王衆長行十法。鈔第四夜叉王下前之十段。長行偈頌委釋。第十一段去。卽摘難釋。此下多不釋。偈有難者。懸引釋於長行之中。講者自對會之。

疏初一卽北方天王得以無邊等者。謂善者自樂不待加哀。惡者必苦心則偏重。巧救多門。故云無邊。又此天能伏惡鬼。令不犯衆生。是救護也。

自在音夜叉王得普觀察衆生方便救護解脫門。

疏二智觀悲救救苦護善不滯空有故云方便。

嚴持器仗夜叉王得能資益一切甚羸惡衆生解脫門。

疏三惡業障重名甚羸惡。又羸無善力。謂一闡提惡卽弊惡。謗方等經者。明示妙理。是謂資益。大智慧夜叉王得稱揚一切聖功德海解脫門。

疏四傲佛歎佛得名聞果。

燄眼主夜叉王得普觀察一切衆生大悲智解脫門。

疏五悲智二照合爲一心與法身俱。故恒觀察。

金剛眼夜叉王得種種方便利益安樂一切衆生解脫門。



疏六、妙音說法、利益多端、唯應度者、聲暨能益。

勇健臂夜叉王、得普入一切諸法義解脫門。

疏七、教廣理深、一句能演、卽是普入。

勇敵大軍夜叉王、得守護一切衆生、令住於道、無空過者、解脫門。

疏八、令物離邪、則能住正、爲守護矣、然住正道者、則不分別是邪是正、云不思議。

淨名入不二法門品中、珠頂王菩薩之言。

富財夜叉王、得增長一切衆生福德聚、令恒受快樂解脫門。

疏九、集福德因、受快樂果、由身智光、得增長也。

力壞高山夜叉王、得隨順憶念出生佛力智光明解脫門。

疏十、念佛修因、生十力果、天未證極、故云隨順。

爾時多聞大夜叉王、承佛威力、普觀一切夜叉衆會、而說頌言。

疏偈中亦十文顯可知。

衆生罪惡深可怖、於百千劫不見佛、漂流生死受衆苦、爲救是等佛興世、如來救護諸世間、悉現一切衆生前、息彼畏塗輪轉苦、如是法門音王入、衆生惡業爲重障、佛示妙理令開解、譬以明燈照世間、此法嚴仗能觀見、佛昔劫海修諸行、稱讚十方一切佛、故有高遠大名聞、此智慧王之所了。

智慧如空無有邊。法身廣大不思議。是故十方皆出現。燄目於此能觀察。一切趣中演妙音。說法利益諸羣生。其聲所暨號苦滅。入此方便金剛眼。一切甚深廣大義。如來一句能演說。如是教理等世間。勇健慧王之所悟。一切衆生住邪道。佛示正道不思議。普使世間成法器。此勇敵軍能悟解。世間所有衆福業。一切皆由佛光照。佛智慧海難測量。如是富財之解脫。憶念往劫無央數。佛於是中修十力。能令諸力皆圓滿。此高幢王所了知。復次善慧摩睺羅伽王。得以一切神通方便令衆生集功德解脫門。

疏第五、摩睺羅伽衆十法一、普現威光名爲神通。不動性淨。示涅槃因。故云方便。依因集德。必得無依涅槃。

淨威音摩睺羅伽王。得使一切衆生除煩惱得清涼悅樂解脫門。

疏二、除惑契寂。是清淨因。清涼悅樂。是涅槃果。

勝慧莊嚴髻摩睺羅伽王。得普使一切善不善思覺衆生入清淨法解脫門。

疏三、善者善之。不善者佛示善之。善覺示亡。乃入本淨。鈔善者善之等。卽道德經云。善者吾善之。不

善者吾亦善之。

妙目主摩睺羅伽王。得了達一切無所著福德自在平等相解脫門。

疏四、福非福相。染不可著。非福現福。名自在相。佛佛無二。是平等相。

燈幢摩睺羅伽王得開示一切衆生令離黑暗怖畏道解脫門。

疏五、無智黑因如燈開示怖畏苦果如幢爲歸。

最勝光明幢摩睺羅伽王得了知一切佛功德生歡喜解脫門。

疏六、以知佛德同空齊己一性故歡喜也。

師子臆摩睺羅伽王得勇猛力爲一切衆生救護主解脫門。

疏七、見理決斷聞深不怖聞淺不疑聞非深非淺意而有勇八風不傾爲勇猛力既以自正必能正他。爲救護主。鈔聞深不怖等者大分深義所謂空也聞說於空謂同斷滅故令人怖故大品云既非先有亦非後無自性常空勿生驚怖聞淺不疑者淺謂涉事方便多門則令疑惑今知隨宜何所疑耶聞非深非淺謂無所據使身心茫然知非深爲妙有非淺爲真空離身心相方爲勇猛可造斯境又此三句亦卽三觀初空次假後中道三句齊聞一念皆會。

衆妙莊嚴音摩睺羅伽王得令一切衆生隨憶念生無邊喜樂解脫門。

疏八、往修喜因故見念皆喜。

須彌臆摩睺羅伽王得於一切所緣決定不動到彼岸滿足解脫門。

疏九、見理智成則緣不動智爲行本諸度悉圓亦猶海納百川更不流矣。

可愛樂光明摩睺羅伽王得爲一切不平等等衆生開示平等道解脫門。

疏十、開生等理示佛等應破情不等令悟性等爲平等道。

爾時善慧威光摩睺羅伽王承佛威力普觀一切摩睺羅伽衆而說頌言。  
疏十偈如次文顯可知。

汝觀如來性清淨。普現威光利羣品。示甘露道使清涼。衆苦永滅無所依。  
一切衆生居有海。諸惡業惑自纏覆。示彼所行寂靜法。離塵威音能善了。  
佛智無等叵思議。知衆生心無不盡。爲彼闡明清淨法。如是嚴髻心能悟。  
無量諸佛現世間。普爲衆生作福田。福海廣大深難測。妙目大王能悉見。  
一切衆生憂畏苦。佛普現前而救護。法界虛空靡不周。此是燈幢所行境。  
佛一毛孔諸功德。世間共度不能了。無邊無盡同虛空。如是廣大光幢見。  
如來通達一切法。於彼法性皆明照。如須彌山不傾動。入此法門師子臆。  
佛於往昔廣大劫。集歡喜海深無盡。是故見者靡不欣。此法嚴音之所入。  
了知法界無形相。波羅密海悉圓滿。大光普救諸衆生。山臆能知此方便。  
汝觀如來自在力。十方降現罔不均。一切衆生咸照悟。此妙光明能善入。  
復次善慧光明天緊那羅王得普生一切喜樂業解脫門。

疏第六緊那羅王十法一世喜樂業皆因佛生。

妙華幢緊那羅王得能生無上法喜令一切受安樂解脫門。

疏二聞深適神故法喜無上終得涅槃無盡安樂。

種種莊嚴緊那羅王。得一切功德滿足。廣大清淨。信解藏解脫門。

疏三、佛德深廣。信亦包含。

悅意吼聲。緊那羅王。得恒出一切悅意聲。令聞者離憂怖。解脫門。

疏四、音演眞法。令聞。故妄憂除。而意悅。

寶樹光明。緊那羅王。得大悲。安立一切衆生。令覺悟。所緣解脫門。

疏五、達境唯心。而本空。則安立衆生於覺悟。

普樂見。緊那羅王。得示現一切妙色身。解脫門。

疏六、難遇益生。所以示現。相嚴常住。名爲妙色。

最勝光莊嚴。緊那羅王。得了知一切殊勝莊嚴果。所從生業。解脫門。

疏七、大智普慈。是二嚴果。一切智因。是能生業。

微妙華幢。緊那羅王。得善觀察一切世間業。所生報。解脫門。

疏八、業細難窮。自觀示物。

動地方。緊那羅王。得恒起一切利益衆生事。解脫門。

疏九、神通益物。無間稱恒。

威猛主。緊那羅王。得善知一切緊那羅心。巧攝御。解脫門。

疏十、知機巧化。謂攝心正智。御心如境。

爾時善慧光明天緊那羅王承佛威力普觀一切緊那羅衆而說頌言。

疏十頌次第文並可知。

世間所有安樂事一切皆由見佛興導師利益諸衆生。普作救護歸依處。出生一切諸喜樂。世間咸得無有盡。能令見者不唐捐。此是華幢之所悟。佛功德海無有盡。求其邊際不可得。光明普照於十方。此莊嚴王之解脫。如來大音常演暢。開示離憂真實法。衆生聞者咸欣悅。如是吼聲能信受。我觀如來自在力。皆由往昔所修行。大悲救物令清淨。此寶樹王能悟入。如來難可得見聞。衆生億劫時乃遇。衆相爲嚴悉具足。此樂見王之所觀。汝觀如來大智慧。普應羣生心所欲。一切智道靡不宣。最勝莊嚴此能了。業海廣大不思議。衆生苦樂皆從起。如是一切能開示。此華幢王所了知。諸佛神通無間歇。十方大地恒震動。一切衆生莫能知。此廣大力恒明見。處於衆會現神通。放大光明令覺悟。顯示一切如來境。此威猛主能觀察。復次大速疾力迦樓羅王。得無著無礙眼。普觀察衆生界解脫門。

疏第七迦樓羅王依賢首靜法。皆云準頌。長行脫第五執持王一智無著故。見無礙。悲普觀故。通悉調。不可壞寶髻迦樓羅王。得普安住法界教化衆生解脫門。

疏二徧坐覺樹名住法界現通說法名爲教化。

清淨速疾迦樓羅王得普成就波羅密精進力解脫門。

疏三、進策諸度往修故成。

不退心莊嚴迦樓羅王得勇猛力入如來境界解脫門。

疏四、境界如偈文絕思則入方爲勇猛。

大海處攝持力迦樓羅王得入佛行廣大智慧海解脫門。

疏五、諸本多脫遇本有文云大海處攝持力迦樓羅王得能竭衆生煩惱海解脫門。多是古疏本脫。今

依有本。然偈約能竭說佛福智。今南藏能竭衆生煩惱海

堅法淨光迦樓羅王得成就無邊衆生差別智解脫門。

疏六、衆生無邊故成就智多。

妙嚴冠髻迦樓羅王得莊嚴佛法城解脫門。

疏七、城有三義。一、防外敵。二、養人衆。三、開門引攝。鈔城有三義。下文有二意。初解長行城義。後會偈

頌門義。前中有三。初立城三義。

疏今言法城。通教理行果。行契理教。則無不俱嚴故。鈔次今言法城已下。出城體。

疏各有三義。謂了心城之性空。則衆惑不入。見恒沙性德。則萬行爰增。道無不通。則自他引攝。鈔三

各有三義下。別釋教理行果。皆有防外敵等三。而四法爲三。以理行合釋。非理不顯行。非行不顯理。故

謂若了心城之性空。則衆惑不入。是防外敵義。性空是理。謂自性淨心。不與妄合。卽理防外敵。了空卽

行。衆惑不入。卽行爲城。名防外敵。見恒沙性德。則萬行爰增。卽是第二養人衆義。恒沙性德。是不空藏。是理所養。見卽行體。萬行爰增。卽行養人衆義。以知法性本寂。有大智慧。增定慧等。道無不通。則自他引攝者。第三開門引攝義。道無不通。言含二意。一理卽是道。無不通故。卽開門引攝。二行契於道。則無所不通。故能引攝。二利之行。

疏便能契果。絕百非以成解脫。養衆德以全法身。開般若而無不通矣。鈔便能契下。約果城說三義。果由理行。故便能卽契果位。三德爲涅槃城之三義矣。

疏方顯教城。無非養所詮旨。句句通神。鈔方顯教城下。第三由上三城。皆因能詮。方顯教功。三義可思。

疏有斯多義。故偈云。廣大叵窮。重重四門。故無數量。究竟能闡。唯我世尊。鈔有斯多義下。二會釋偈文。重重四門者。且第一重卽是四句。謂一有門。二空門。三亦空。亦有門。四非空。非有門。天台以斯歷於四教。則有四箇四門。略如前玄談中辨。今且於一重四句中。更有四重四門。然執著成見。取成四謗。得意爲門。今取門義。言四重者。卽單四句。如向所說。二複四句。謂一有有無。二無有無。三亦有亦無。四亦無有。非有非無。四非有非無。非有非無。而言複者。四句之中。皆說有無故。第三具足四句者。四句之中。皆具四故。第一有句具四者。謂一有有。二有無。三有亦。亦無。四有非。非無。第二無句中。四者。一無有。二無無。三無亦有。亦無。四無非。非有。非無。第三亦有亦無具四者。一亦有。亦無。二亦有。亦無。三亦有。亦無。四亦有。亦無。第四非有非無具四者。一非有。非無。二非有。非無。三非有。非無。四非有。非無。



無三、非有非無、亦有亦無、四、非有非無、非有非無、上四四一十六句爲具足四句。第四絕言四句者、一、單四句外一絕言、二、複四句外一絕言、三、具足四句外一絕言、有三絕言、若爲見釋、上諸四見、一一皆有八十八使相應、是見卽外道見故、若約佛法、歷四教四門、各生四見、又一種四句、各一絕言、如是一、亦各有八十八使、六十二見、百八等惑、若破諸見、一一見破、一一成門、故云重重四門、又重重者、如一、有無門、具諸四句、則歷常、無常、我、無我等、亦有多四句、謂一、有無常、二、無無常、三、亦有亦無無常、四、非有非無無常等、又歷萬行、謂布施等、如云一、有布施、二、無布施、三、亦有亦無布施、四、非有非無布施等。

普捷示現迦樓羅王、得成就不可壞平等力解脫門。

疏八、法身無相、故不可壞、體卽真如、凡聖平等、無分別智、安住證會、名成就力。

普觀海迦樓羅王、得了知一切衆生身而爲現形解脫門。

疏九、現同類形、方便調伏。

龍音大目精迦樓羅王、得普入一切衆生、攷生行智解脫門。

疏十、衆生攷生、皆由行業、佛生死智、方能普入。



# 大方廣佛華嚴經疏鈔會本卷十一

爾時大速疾力迦樓羅王承佛威力普觀一切迦樓羅衆而說頌言。

疏頌文如次配釋可知。

佛眼廣大無邊際。普見十方諸國土。其中衆生不可量。現大神通悉調伏。  
佛神通力無所礙。徧坐十方覺樹下。演法如雲悉充滿。寶髻聽聞心不逆。  
佛於往昔修諸行。普淨廣大波羅密。供養一切諸如來。此速疾王深信解。  
如來一一毛孔中。一念普現無邊行。如是難思佛境界。不退莊嚴悉明覩。  
佛行廣大不思議。一切衆生莫能測。導師功德智慧海。此執持王所行處。  
疏但第五偈或有前脫。故略釋之。初二句甚深廣大。次句福智相嚴。行通因果。因深果遠。已不思議。復  
有一行。是如來行。所謂大乘大般涅槃。則行爲果。皆絕言道。佛行如出現品。鈔復有一行。是如來  
行。卽涅槃第十一。至下更引。

如來無量智慧光。能滅衆生痴惑網。一切世間咸救護。此是堅法所持說。  
法城廣大不可窮。其門種種無數量。如來處世大開闡。此妙冠髻能明入。  
一切諸佛一法身。真如平等無分別。佛以此力常安住。普捷現王斯具演。  
佛昔諸有攝衆生。普放光明徧世間。種種方便示調伏。此勝法門覺海悟。

佛觀一切諸國土。悉依業海而安住。普雨法雨於其中。龍音解脫能如是。復次、羅曠阿修羅王。得現爲大會尊勝主解脫門。

疏第八、阿修羅王十法。一、修羅尊勝。等須彌之高。如來威光。蔽十方大衆。衆生各見。眞勝主也。毘摩質多羅阿修羅王。得示現無量劫解脫門。

疏二、彼能以一絲作種種事。令一刹那。現於多劫調生等事。

巧幻術阿修羅王。得消滅一切衆生苦。令清淨解脫門。

疏三、以多法門。入佛境界。則苦滅心淨。種種法門。亦如幻也。下云苦末羅。卽巧幻梵音。大眷屬阿修羅王。得修一切苦行。自莊嚴解脫門。

疏四、多劫多苦。爲物非已。如尸毘救。鴿薩埵。投崖。已是丈夫最勝嚴飾。況終剋寂智。萬德以嚴。翻顯無利勤苦。誠爲可醜。旣爲物而行。故有大眷屬。鈔如尸毘王代鴿。卽智論第五。及報恩經。皆本師本行。如常所知。

婆稚阿修羅王。得震動十方無邊境界。解脫門。

疏五、以大幻通力。動刹悟機。不怖衆生。斯爲大力。大力婆稚。華梵異耳。

徧照阿修羅王。得種種方便。安立一切衆生。解脫門。

疏六、開種種權門。安衆生於一極之樂。權爲入大之本故。皆佛智因。權實不迷。斯爲徧照。堅固行妙莊嚴阿修羅王。得善集不可壞善根。淨諸染著。解脫門。

疏七、萬善順理。普不可壞。斯解脫處。何染不亡。功歸正覺。故偈云。佛力如是修者。堅固妙嚴。廣大因慧。阿修羅王。得大悲力。無疑惑。主解脫門。

疏八、悲用智故。普令無疑。主斯事者。廣大因慧。

現勝德。阿修羅王。得普令見佛承事。供養修諸善根。解脫門。

疏九、供事修善。有勝德故。

善音。阿修羅王。得普入一切趣。決定平等行。解脫門。

疏十、普入諸趣。明處無不徧。偈云。三世時無不均。同有佛性。名爲決定。具上三義。平等行焉。不宜實義。非善音也。此上一段。及後夜神。皆結歸名。上下例然。恐繁不釋。

爾時羅睺阿修羅王。承佛威力。普觀一切阿修羅衆。而說頌言。

疏頌文如次可知。

十方所有廣大衆。佛在其中最特殊。光明徧照等虛空。普現一切衆生前。百千萬劫諸佛土。一剎那中悉明現。舒光化物靡不周。如是毘摩深讚喜。如來境界無與等。種種法門常利益。衆生有苦皆令滅。苦末羅王此能見。無量劫中修苦行。利益衆生淨世間。由是牟尼智普成。大眷屬王斯見佛。無礙無等大神通。徧動十方一切刹。不使衆生有驚怖。大力於此能明了。佛出於世救衆生。一切智道咸開示。悉令捨苦得安樂。此義徧照所弘闡。

世間所有衆福海。佛力能生普令淨。佛能開示解脫處。堅行莊嚴入此門。佛大悲身無與等。周行無礙悉令見。猶如影像現世間。因慧能宣此功德。希有無等大神通。處處現身充法界。各在菩提樹下坐。此義勝德能宣說。如來往修三世行。諸趣輪迴靡不經。脫衆生苦無有餘。此妙音王所稱讚。復次。示現宮殿主晝神。得普入一切世間解脫門。

疏自下第三諸神衆。有十九衆。今初。主晝神十法。一、智了物心。如空入色。光照身器。如日合空。身徧器中。如像在鏡。世間主力。能攝此身。此身之性。等世間故。皆入觀機。故名普入。所入之處。卽爲宮殿。鈔智了物心。如空入色者。取下偈意。偈中如空是喻。光明之言。合於法喻。餘皆是法。法喻相對。略有三入。一、以初句佛智爲能入。第三句衆生心行爲所入。入者了達義。故八十經云。佛智廣大同虛空。普徧一切衆生心。悉了世間諸妄想。不起種種異分別。此卽智了物心。而云如空入色者。出現品云。譬如虛空。徧至一切色非色處。二、言光照身器。如日合空者。卽以第二句光明爲能入。第四句爲所入。一切世間。卽衆生世間。及器世間。故云光照身器。卽取上空喻爲所入。取光明上法喻。皆爲能入。光通二種。身光照事。智光雙照事理。三、身徧器中。如像在鏡者。卽唯取第四句。自有能所。則無不入。言通三種。入一光入。二智入。如上已說。三身入。但言無不入。不揀身故。而言如像在鏡者。將上如空普徧。喻此亦齊。今旁出一喻。以喻身入。質來對鏡。鏡中見像。像是質像。機感對利。利中見佛。佛是心佛。世間主力。下。上是佛德。今攝就晝神。故云能攝此身。此身之性等世間故者。彰入所以。智身色身。皆等世間。論云。智性色性。

皆相卽故。皆入觀機。彰入之意。並釋普字。結歸長行。所入之處下。結歸神名。以難見故。所以偏結隨緣。非有之法身等。至第五經當釋。

發起慧香主晝神。得普觀察一切衆生。皆利益令歡喜滿足解脫門。

疏二、義圓稱機。故滿心成益。

樂勝莊嚴主晝神。得能放無邊可愛樂法光明解脫門。

疏三、身法二光。皆可愛樂。

華香妙光主晝神。得開發無邊衆生清淨信解心解脫門。

疏四、法雨潤種。已含實者解開。善未芽者信發。

普集妙藥主晝神。得積集莊嚴普光明力解脫門。

疏五、無法不悟。名普明力。曠劫修集。成智莊嚴。

樂作喜目主晝神。得普開悟一切苦樂衆生。皆令得法樂解脫門。

疏六、方便開示世樂亦苦。令其悟入見理法樂。如歡喜地也。

觀方普現主晝神。得十方法界差別身解脫門。

疏七、如來身雲。就體則非有無。約機則差別徧於十方。不可謂之無。約佛則稱眞法界。不可謂之有。此則隨緣非有之法身。恆不異事而顯現。以化寂滅非無之衆生。恆不異眞而成立。卽無差別之差別也。大悲威力主晝神。得救護一切衆生。令安樂解脫門。

疏八、處危者護之令安。有苦者救之令樂。

善根光照主晝神。得普生喜。足功德力解脫門。

疏九、衆生暗於多欲。故沉淪長夜。以法開曉。喜足爲先。喜足智俱。是功德力。能令離苦。得安樂故。

妙華瓔珞主晝神。得聲稱普聞。衆生見者皆獲益解脫門。

疏十、有覺德行。故名稱普聞。既福廣名高。故不虛其益。鈔十有覺德行者。卽毛詩言。注云。覺。大也。

爾時示現宮殿主晝神。承佛威力。普觀一切主晝神衆。而說頌言。

疏偈文可知。

佛智如空無有盡。光明照耀徧十方。衆生心行悉了知。一切世間無不入。

知諸衆生心所樂。如應爲說衆法海。句義廣大各不同。具足慧神能悉見。

佛放光明照世間。見聞歡喜不唐捐。示其深廣寂滅處。此樂莊嚴心悟解。

佛雨法雨無邊量。能令見者大歡喜。最勝善根從此生。如是妙光心所悟。

普入法門開悟力。曠劫修持悉清淨。如是皆爲攝衆生。此妙藥神之所了。

種種方便化羣生。若見若聞咸受益。皆令踊躍大歡喜。妙眼晝神如是見。

十力應現徧世間。十方法界悉無餘。體性非無亦非有。此觀方神之所入。

衆生流轉險難中。如來哀愍出世間。悉令除滅一切苦。此解脫門悲力住。

衆生闇覆淪永夕。佛爲說法大開曉。皆使得樂除衆苦。大善光神入此門。



如來福量同虛空。世間衆福悉從生。凡有所作無空過。如是解脫華纓得。

復次、普德淨光主夜神得寂靜禪定樂大勇健解脫門。

疏第二、主夜神十法。初七夜神是善財十地善友。見解深廣。彌顯衆海。法門難思。一、普德淨光。卽善財離垢地善友。彼名全同。法門名寂靜禪定樂普游步。普游步言。卽大勇健也。寂靜禪定樂。卽是定體。現法樂住。故名爲樂。大勇健者。卽是定用。健則堪能。勇則無畏。謂見佛靜機游戲神通。故名勇健。亦游步也。勇健廣大。故稱普德。無惑智俱。可謂淨光。

喜眼觀世主夜神得廣大清淨可愛樂功德相解脫門。

疏二、卽發光地善友。彼名喜目。觀察衆生。解脫名大勢力。普喜幢。謂此解脫。德無不備。化無不周。名大勢力。卽今廣大。身惑俱淨。無不樂見。故云普喜。悲爲德相。卽幢義也。觀察普喜。名爲喜目。

護世精氣主夜神得普現世間調伏衆生解脫門。

疏三、卽燄慧地善友。彼名普救衆生妙德。護世精氣。方是救生。由護生故。顯德之妙也。法門全同。次第又當。謂感必現前。調令清淨故。

寂靜海音主夜神得積集廣大歡喜心解脫門。

疏四、卽難勝地善友。彼名寂靜音海。法門名念念出生。廣大喜莊嚴。念念出生。卽積集義。見佛利生。故生大喜莊嚴二義。一見佛修歡喜因。嚴樂見果故。二積集此喜。神自莊嚴。由定發音。名寂靜音。深廣如海。

普現吉祥主夜神得甚深自在悅意言音解脫門。

疏五、卽現前地善友。彼云守護一切城增長威力。偈云尸利。以梵音含於二義。一云吉祥。二翻爲守。故下譯跋陀室利以爲賢首。又以首字音同義別。彼爲頭首。法界品中。乃爲守護。皆譯者方言少融耳。若以義會增長威力。卽是普現吉祥。正當次第。法門又同。彼云甚深自在妙音解脫。妙音故悅意。悅則意淨。卽寂能演。故名自在。

普發樹華主夜神得光明滿足廣大歡喜藏解脫門。

疏六、卽遠行地善友。彼云開敷一切樹華。一切開敷。卽普發也。法門彼云菩薩出生廣大喜光明。文少倒略耳。舊經云。菩薩無量歡喜知足光明。知足滿足。文相近也。謂能知如來巧智示法大福威光。故曰光明。佛以福智滿足物心。則含喜名藏。

平等護育主夜神得開悟衆生令成熟善根解脫門。

疏七、卽不動地善友。彼名大願精進力救護一切衆生。法門名教化衆生令生善根。教化開悟。文異義同。令生成熟。始終異耳。謂現通示相。皆爲調化。一切善根。皆令生長。平等護育。卽救護一切。精進大願。故能爲之。今文略耳。

遊戲快樂主夜神得救護衆生無邊慈解脫門。

疏八、念念久修。恆徧救護。是無邊慈也。此與善財歡喜地善友似同。而文多異。又非其次。故但直釋。諸根常喜主夜神得普現莊嚴大悲門解脫門。

疏九於三毒難壞衆生。以大悲門現莊嚴身。故石室留影。毒龍心革者。革變也。卽觀佛三昧海經。彼事極長。今當略意。卽第七經。佛告阿難云。如來到那乾訶羅國古仙山。蘆華林毒龍池側。青蓮華泉北羅刹穴中。阿那斯山南。爾時彼穴有五羅刹。化作龍女。與毒龍通。龍復降雹。羅刹亂行。饑饉疾疫。已歷四年。時王驚懼。禱祀神祇。於事無益。下取意引。有一梵志讚佛功德。彼王焚香遙請如來。如來受那乾訶羅王弗巴浮提請。廣現神變。羅刹毒龍既受化已。爾時龍王長跪合掌。勸請世尊。唯願如來常住此間。佛若不在。我發惡心。無由得成。無上菩提。世尊不離龍窟。復受王請。入城教化。遊行往昔行菩薩道處。諸龍皆從。聞佛欲還。復啼哭雨淚。白佛言。世尊。請佛常住。云何捨我。我不見佛。當作惡事。墜墮惡道。爾時世尊安慰龍王。我受汝請。坐汝窟中。千五百歲。釋迦文佛跏身入石。猶如明鏡。見人面像。諸龍皆見佛在石內。影現於外。爾時諸龍合掌歡喜。不出其池。常見佛日。爾時世尊結跏趺坐。在石壁內。衆生見時。遠望則見。近則不現。諸天百千供養佛影。影亦說法。時梵天王合掌恭敬。以偈頌曰。如來處石窟。躡身入石裏。如日無障礙。金光相具足。我今頭面禮。牟尼救世尊。經文甚廣。復令衆生觀於佛座。見丈六像坐於草座。作一石窟。高丈八尺。深二十四步。青白石相。又想此窟成七寶窟。復見佛像躡入石壁等。廣弘明集說。遠公有石影讚說。處所與經全同。云在西域那伽訶羅國南山古仙石室中。度流沙逕道。去此一萬五千八百五十里。感世之應。備於別傳。西域記第八亦說。遠公序云。昔遇西域沙門。輒殮遊方之說。知有佛影。而傳者尙未曉然。及在此山。值闍賓禪師。南國律學道士。與昔聞既同。並是其人遊歷所經。因其詳問。乃圖之。爲銘曰。廓矣大象。理玄無名。體神入

化落影離形。迴輝層巖。凝映虛亭。在陰不昧。處暗逾明。婉出蟬蛻。朝宗百靈。應不同方。迹絕兩冥。其一  
茫茫荒宇。靡勸靡獎。淡虛寫容。拂空傳像。相具體微。沖資自朗。白毫吐曜。昏夜中爽。感誠乃應。扣機發  
響。留音停岫。津悟冥賞。撫之有會。功弗由曩。其二餘如廣弘明集。屬賓禪師。卽耶舍三藏。  
示現淨福主夜神。得普使一切衆生所樂滿足解脫門。

疏十本爲衆生。故成自德。令他樂滿。

爾時普德淨光主夜神。承佛威力。徧觀一切主夜神衆。而說頌言。

汝等應觀佛所行。廣大寂靜虛空相。欲海無涯悉治淨。離垢端嚴照十方。

疏偈中十偈如次。初中初句。解脫之力量觀。次句卽寂靜樂神。以此定觀佛此體。故下經云。普見三世  
佛。而無取著。以知如來無相。性相本空。故云寂靜虛空相也。次句卽大勇健。準下經。則自他兼淨也。  
次句定果也。上約佛說。若約天說。卽四句皆是定用。以住此解脫。能見佛體用因果。故

一切世間咸樂見。無量劫海時一遇。大悲念物靡不周。此解脫門觀世觀。  
導師救護諸世間。衆生悉見在其前。能令諸趣皆清淨。如是護世能觀察。

疏二三可知。

佛昔修治歡喜海。廣大無邊不可測。是故見者咸欣樂。此是寂音之所了。

疏四中。稱理徧喜。爲廣大無邊。縱內心不搖。而外現威怒。更深難測。

如來境界不可量。寂而能演徧十方。普使衆生意清淨。尸利夜神聞踊悅。

疏五、以寂故能徧。

佛於無福衆生中、大福莊嚴甚威曜。示彼離塵寂滅法。普發華神悟斯道。疏六、以衆生本來自盡。故是寂滅。是以智窮妄末。理無不顯。妄徹眞源。惑無不盡。喜方滿足。餘四可知。十方普現大神通。一切衆生悉調伏。種種色相皆令見。此護育神之所觀。如來往昔念念中。悉淨方便慈悲海。救護世間無不徧。此福樂神之解脫。衆生愚癡常亂濁。其心堅毒甚可畏。如來慈愍爲出興。此滅冤神能悟喜。佛昔修行爲衆生。一切願欲皆令滿。由是具成功德相。此現福神之所見。復次、徧住一切主方神。得普救護力解脫門。

疏第三主方神十法。一、現身說法。令悟得果。皆救護力。

普現光明主方神。得成辦化一切衆生神通業解脫門。

疏二、神通示相。是能成辦業。衆生出苦。是所成辦業。

光行莊嚴主方神。得破一切闇障。生喜樂。大光明解脫門。

疏三、法光破闇。闇斷智生。智與法喜俱生。斷以寂滅爲樂。

周行不礙主方神。得普現一切處。不唐勞解脫門。

疏四、普現說法。聞必惑滅。故不唐勞。

永斷迷惑主方神。得示現等一切衆生數名號。發生功德解脫門。

疏五、聖人無名。隨物立名。貴在生德。及滅惑耳。

徧遊淨空。主方神得。恆發妙音。令聽者皆歡喜解脫門。

雲幢大音。主方神得。如龍普雨。令衆生歡喜解脫門。

疏六七可知。

髻目無亂。主方神得。示現一切衆生業無差別。自在力解脫門。

疏八、業同性空。並不失報。俱無差異。性相無礙。爲自在力。說能感報。令除惡業。說業性空。善業亦亡。

普觀世業。主方神得。觀察一切趣生中種種業解脫門。

疏九、前約說業性相。令物絕業。此約知業差別。擬隨機化。

周徧遊覽。主方神得。所作事皆究竟。生一切衆生歡喜解脫門。

疏十、世人靡不有初。鮮克有終。今聖人有志有能。故所作究竟。世人以人隨欲。不能兼亡。今有慈有愍。故令物喜。謂十波羅密。無不究竟。四無量心。令物歡喜。鈔世人靡不有初等者。本卽毛詩。王注周易。亦用此言。靡無也。鮮少也。克能也。世人以人隨欲者。書云。小人以人從欲。君子以欲從人。言不能兼亡者。亡無也。然兩字相連。卽莊子意。而亡字有心。則自他相忘。不恃己功也。今云兼於無道之人耳。爾時徧住一切主方神。承佛威力。普觀一切主方神衆。而說頌言。

疏頌中次第配釋可知。

如來自在出世間。教化一切諸羣生。普示法門令悟入。悉使當成無上智。

神通無量等衆生。隨其所樂示諸相。見者皆蒙出離苦。此現光神解脫力。  
佛於闍障衆生海。爲現法炬大光明。其光普照無不見。此行莊嚴之解脫。  
具足世間種種音。普轉法輪無不解。衆生聽者煩惱滅。此徧住神之所悟。  
一切世間所有名。佛名等彼而出生。悉使衆生離癡惑。此斷迷神所行處。  
若有衆生至佛前。得聞如來美妙音。莫不心生大歡喜。徧遊虛空悟斯法。  
佛於一一剎那中。普雨無邊大法雨。悉使衆生煩惱滅。此雲幢神所了知。  
一切世間諸業海。佛悉開示等無異。普使衆生除業惑。此髻目神之所了。  
一切智地無有邊。一切衆生種種心。如來照見悉明了。此廣大門觀世入。  
佛於往昔修諸行。無量諸度邊圓滿。大慈哀愍利衆生。此徧遊神之解脫。  
復次淨光普照主空神。得普知諸趣一切衆生心解脫門。

疏第四、主空神長行十法。一、智慧造理。則十眼廣照日月合空。則萬象歷然。  
普遊深廣主空神。得普入法界解脫門。

疏二、身智二光徧入法界。

生吉祥風主空神。得了達無邊境界身相解脫門。

疏三、佛身如空。是無邊境。無生無染。爲吉祥風。

離障安住主空神。得能除一切衆生業惑障解脫門。

疏四、廣說聖道。則離三障。安住二空。

廣步妙髻主空神。得普觀察。思惟廣大行海解脫門。

疏五、上求下化。名廣大行。爲安衆生。如妙髻焉。

無礙光燄主空神。得大悲光普救護。一切衆生厄難解脫門。

疏六、沉生死之厄難。悲智光以濟之。

無礙勝力主空神。得普入一切無所著福德力解脫門。

疏七、不礙福智相導。是謂勝力。

離垢光明主空神。得能令一切衆生心離諸蓋清淨解脫門。

疏八、惑由智遣。

深遠妙音主空神。得普見十方智光明解脫門。

疏九、妙音善說。

光徧十方主空神。得不動本處而普現世間解脫門。

疏十、不壞本處而稱周十方。

爾時淨光普照主空神。承佛威力。普觀一切主空神衆。而說頌言。

疏偈中十頌如次。

如來廣大目。清淨如虛空。普見諸衆生。一切悉明了。佛身大光明。徧照於十方。處處現前住。普遊觀此道。



佛身如虛空。無生無所取。無得無自性。吉祥風所見。

疏三中。空有四義。含於五法。一、離能取生。卽絕妄想。二、離所取相。無相無名。三、境無自性。卽是如如。四、心無所得。是爲正智。迷如以成名相。妄想是生。悟名相之本如。執翻成智。如外無智。智體卽如此。二、猶空寂照無礙。如斯見佛。是曰吉祥。鈔空有四義。含於五法者。四義卽無生等。五法卽名等。今當先釋五法。後消疏文。五法經論皆具。且依楞伽列次者。則名相妄想。正智如如。以爲其次。若瑜伽七十二云。一相二名三分別。四真如。五正智。分別卽妄想異名相。謂言談安足事處。名卽於相所有增語。分別。謂三界行中。所有心心所。真如。謂無爲法。無我所顯。聖智所行。非一切言談安足事處。正智略有二種。一、唯出世間正智。二、世間出世間正智。釋曰。上卽根本。下卽後得。此之五法。爲假爲實。然相通假實。亦具假實二有。名唯假有。分別同相。以有三界心心所實法。故是實有。若虛妄計度。故是假有。真如唯實有。二智俱實有。此五二諦。何諦所攝。前三、世俗有真如。勝義有根本智。勝義有後得智。通二有五。從何生。名從欲生。相與分別。俱從想分別生。真如無生。智從聽聞正法。如理作意生。此之五法。爲一爲異。今且將相望餘四法。論異不異者。一、相與名若異。名應實有不異。取相應得名。二、與分別若異。則分別應非相。若不異。分別外相。應以分別爲性。三、與真如若異。則相之勝義。應非是如。觀者應捨相求如。正覺真如。應不覺相。若不異。真如無差別。相亦無差別。得相之時。應得真如。又得真時。亦應得相。應不清淨。四、相與正智。如相與分別說。應知名與分別及正智。及分別於正智。皆當言異。餘略可知。已知五法名相差別。今當消疏。疏中先以五法屬文。後迷如下。辨因起融攝。言迷如以成名相。則妄想是生者。此顯迷

時。唯有三法。一名、二相、三妄想。故此五法。通該一切。而不必同時。謂妄想正智。此必不並。故今有妄想。決無正智。其如名相。則有隱顯。此中迷故。如如則隱。名相則顯。次云。悟名相之本。如執翻成智者。此顯悟時。但有其二。一、正智。二、如如。既有正智。決無妄想。了得如如。名相則隱。雖不壞相。舉體卽空。理奪於事。無不蕩盡。是故空中無色等法。故楞伽云。謂了名相及與妄想。體不可得名。爲正智。如如卽是名相。妄想本自不生。釋云。名相不生。則境如矣。妄想不生。則心如矣。了心境。如是爲正智。故唯正智及如。如存。次云。如外無智。智體卽如者。復融上二。以爲一味。如外無智。卽以如攝智。智體卽如。是以智攝如。合爲一味。故下經云。無有智外如。爲智所入。亦無如外智。能證於如。卽斯義也。故疏結云。此二猶空寂。照無礙。寂卽是如。照卽正智。如日合空。雖有二事。一相難分。

如來無量劫。廣說諸聖道。普滅衆生障。圓光悟此門。

疏四中。長行及列。並名安住。今云圓光。圓光表智。安住表定。二事相資。前後互舉。並能滅障。於理無違。我觀佛往昔。所集菩提行。悉爲安世間。妙鬢行斯境。一切衆生界。流轉生死海。佛放滅苦光。無礙神能見。疏六中。生死海者。瑜伽七十云。五法相似生死。得大海名。一、處無邊相似故。二、甚深故。三、難度故。四、不可飲故。五、大寶所依故。釋曰。由前四義。衆生流轉。由第五義。菩薩入之。且約分喻。第九十云。由三相故。不同水海。一、自性不同。分謂水海。唯色一分。二、淪沒不同。唯人畜故。唯沒身故。三、超度不同。未離欲者。亦能度故。生死海反上可思。○餘七偈可知。

清淨功德藏。能爲世福田。隨以智開覺。力神於此悟。衆生癡所覆。流轉於險道。佛爲放光明。離垢神能證。

智慧無邊際。悉現諸國土。光明照世間。妙音斯見佛。佛爲度衆生。修行徧十方。如是大願心。普現能觀察。復次。無礙光明主風神。得普入佛法及一切世間解脫門。

疏第五。主風神十法。一。以方便風。合智日光。智入深法。而無障礙。身入世間。而無影像。

普現勇業主風神。得無量國土。佛出現。咸廣大供養解脫門。

疏二。菩薩以求菩提之大心。持稱真之供具。等虛空之廣大。不礙事之繁多。而以全法之身。一念供無邊之佛。如彼風力。無不成也。

飄擊雲幢主風神。得以香風。普滅一切衆生病。解脫門。

疏三。長風忽來。浮雲散滅。慈風忽起。惑苦病亡。

淨光莊嚴主風神。得普生一切衆生善根。令摧滅重障。山解脫門。

疏四。福智莊嚴之風。摧壞如山之障。

力能竭水主風神。得能破無邊惡魔衆。解脫門。

疏五。十力降魔。十軍皆殄。獨名竭水者。欲愛爲初故。鈔十力降魔。十軍皆殄者。智論第六云。欲是汝

初軍。憂愁軍第二。饑渴軍第三。渴愛軍第四。睡眠軍第五。怖畏軍第六。疑軍爲第七。含毒軍第八。利養軍第九。著虛妄名聞。自高軍第十。輕慢於他人。汝等軍如是一切世間人。及諸一切天。無能破之者。我以智慧箭。修定智爲弓。摧破汝魔軍。如坏餅沒水。今以愛欲爲水。故偏語之。

大聲徧吼主風神。得永滅一切衆生怖解脫門。

疏六、毛孔慈音滅除五怖。若百竅異吹。徧吼悅機。鈔言若百竅異吹者。義則可知。事出莊子。樹杪垂髻主風神。得入一切諸法實相。辨才海解脫門。

疏七、智入實相。故妙辨如海。如風擊樹。故能下垂。普行無礙主風神。得調伏一切衆生。方便藏解脫門。

疏八、調生方便。爲智所入。故名爲藏。

種種宮殿主風神。得入寂靜禪定門。滅極重愚癡闇解脫門。

疏九、禪定宮殿。必定慧雙游。故能滅癡闇。約佛則動寂無二。見必滅癡。

大光普照主風神。得隨順一切衆生。行無礙力解脫門。

疏十、日月明照。非風不運。智行無礙。方便力焉。

爾時無礙光明主風神。承佛威力。普觀一切主風神衆。而說頌言。

疏十偈可知。

一切諸佛法甚深。無礙方便普能入。所有世間常出現。無相無形無影像。汝觀如來於往昔。一念供養無邊佛。如是勇猛菩提行。此普現神能悟了。如來救世不思議。所有方便無空過。悉使衆生離諸苦。此雲幢神之解脫。衆生無福受衆苦。重蓋密障常迷覆。一切皆令得解脫。此淨光神所了知。如來廣大神通力。克殄一切魔軍衆。所有調伏諸方便。勇健威力能觀察。

佛於毛孔演妙音。其音普徧於世間。一切苦畏皆令息。此徧吼神之所了。  
佛於一切衆刹海。不思議劫常演說。此如來地妙辨才。樹杪鬢神能悟解。  
佛於一切方便門。智入其中悉無礙。境界無邊無與等。此普行神之解脫。  
如來境界無有邊。處處方便皆令見。而身寂靜無諸相。種種宮神解脫門。  
如來劫海修諸行。一切諸力皆成滿。能隨世法應衆生。此普照神之所見。



# 大方廣佛華嚴經疏鈔會本卷十二

復次、普光燄藏主火神得悉除一切世間暗解脫門。

疏第六、主火神長行十法。有云準梵本此脫第四一、以進力現世除物無明。以最初故偏從火義。

普集光幢主火神得能息一切衆生諸惑漂流熱惱苦解脫門。

疏二、惑有二義。一漂二惱。善巧迴轉則能息之。

大光徧照主火神得無動福力大悲藏解脫門。

疏三、稱性之福相惑不動與大悲合。自利不動俱能攝德無盡名藏。

衆妙宮殿主火神得觀如來神通力示現無邊際解脫門。此神名及法舊本無。依今經補出。頗與偈文相

合。

疏四、有云準梵本神名勝上。藁光普照法門名普能除煩惱塵。謂劫海行滿。故今能現通滅惑。偈云衆

妙宮神同前列名衆妙。即勝上義耳。然諸本多無。或有本則具云衆妙宮殿主火神得大慈悲廣蔭衆

生解脫門。恐是傳寫脫漏耳。

無盡光髻主火神得光明照曜無邊虛空界解脫門。

疏五、光明照曜等者。日光合空等空無際。智符實相稱實無邊。雖曠劫修成。全同本有。窮靈極數。妙盡

難思。實爲惑本。即是正因。智照心源。即是了因。鈔日光合空等者。初舉喻也。智符已下。二合。以智合

日以實相合空符者。分而合也。實相體上。本有智光。無始迷之。今方朗悟。卽我始會之。非照今有。故與實相分而合也。實相無邊。智亦無邊。如空無際。光亦無際。雖曠劫修成。全同本有者。以偈文會義也。偈云。億劫修成不可思。求其邊際莫能知。義乃修成。智無際耳。何得分而合之。故今答云。雖則修成。全同本有。是以經云。演法實相令歡喜。故疏結云。窮靈極數。卽是修成。妙盡難思。卽符本有。亦猶始覺同本覺。無復始本之異。爲究竟覺。窮靈極數之言。卽肇論劉遺民所難般。若無知論語。具云。但今談者。所疑於高論之旨。欲求聖心之異。爲謂窮靈極數。妙盡冥符耶。爲將心體自然。靈怕獨感耶。若窮靈極數。妙盡冥符。則寂照之名。故是定慧之體耳。若心體自然。靈怕獨感。則羣數之應。固已幾乎息矣。此公意云。若窮靈極數。妙盡冥符。則修極於無修。窮靈爲照。妙盡爲寂。亦是我之定慧。何用別立無知。若心體自然。靈怕獨感。則是體本無知。固合無乎應用。何以言般若無知。對緣而照。故結云。疑者當以撫會。應機親變之知。不可謂之。不有。論主答云。意謂妙盡冥符。不可定慧爲名。靈怕獨感。不可稱羣數已息。兩言雖異。妙用常一。迹我而乖。在聖不殊也。釋云。觀肇公答上句云。旣冥符心體。何可以定慧爲名。若以定慧爲名。則未符心體。答下句意云。靈怕獨感。與窮靈極數。二義相合。何得息於羣數之應。故云兩言雖異。在聖不殊也。今疏總不用彼難答本意。借其問中一句。謂窮其靈鑑。極其數運。妙無不盡。則合心體難思耳。

疏如空與日。今略申十義。以辨難思。一、謂日與空。非卽非離。二、非住非不住。三、而日善作破闇良緣。顯空之要。四、雖復滅暗顯空。空無損益。五、理實無損事。以推之。暗蔽永除。性乃無增。空界所含。萬象皆現。



六、而此虛空性雖清淨。若無日光。則有闡起。七、非以虛空。空故自能除暗。暗若除者。必假日光。八、日若無空。無光無照。空若無日。暗不自除。九、然此暗性。無來無去。日之體相。亦不生不滅。十、但有日照空。則乾坤洞曉。以智慧日照心性空。亦有十義。準喻思之。鈔以智慧日照心性空。下總以法合。憑喻解法。故云思準。

疏非唯釋此文。乃遠通衆經。該羅前後。

種種燄眼主火神。得種種福。莊嚴寂靜光解脫門。

疏六、體寂發照。名寂靜光。以斯成福。莊嚴身相。

十方宮殿如須彌山主火神。得能滅一切世間諸趣熾然苦解脫門。

威光自在主火神。得自在開悟一切世間解脫門。

疏七八可知。

光照十方主火神。得永破一切愚癡執著見解脫門。

疏九、分別法相。永離不了愚癡。悟法實性。便無執著之見。

雷音電光主火神。得成就一切願力。大震吼解脫門。

疏十、以行扶願。故能現世。作師子吼。

爾時普光燄藏主火神。承佛威力。普觀一切主火神衆。而說頌言。

疏頌加第四。餘並可知。

汝觀如來精進力。廣大億劫不思議。爲利衆生現世間。所有暗障皆令滅。  
衆生愚癡起諸見。煩惱如流及火然。導師方便悉滅除。普集光幢於此悟。  
福德如空無有盡。求其邊際不可得。此佛大悲無動力。光照悟入心生喜。  
我觀如來之所行。經於劫海無邊際。如是示現神通力。衆妙宮神所了知。  
億劫修成不可思。求其邊際莫能知。演法實相令歡喜。無盡光神所觀見。  
十方所有廣大衆。一切現前瞻仰佛。寂靜光明照世間。此妙燄神所能了。  
牟尼出現諸世間。坐於一切宮殿中。普雨無邊廣大法。此十方神之境界。  
諸佛智慧最甚深。於法自在現世間。能悉闡明真實理。威光悟此心欣慶。  
諸見愚癡爲暗蓋。衆生迷惑常流轉。佛爲開闡妙法門。光照方神能悟入。  
願門廣大不思議。力度修治已清淨。如昔願心皆出現。此震音神之所了。  
復次、普興雲幢主水神得平等利益一切衆生慈解脫門。

疏第七、主水神長行十法一、無緣大慈是曰平等。

海潮雲音主水神得無邊法莊嚴解脫門。

疏二、無邊行法莊嚴自他。

妙色輪髻主水神得觀所應化方便普攝解脫門。

疏三、寂然不動以觀機感而遂通以隨攝若冬則積雪凝白夏則無處不流。鈔寂然不動以觀機者。

此言即周易繫辭具云、夫易、無思也、無爲也、寂然不動、感而遂通天下之故、今借此言也、善巧漩瀆主水神、得普演諸佛甚深境界解脫門。

疏四、妙音演佛深旨、令悟妙法漩瀆。

離垢香積主水神、得普現清淨大光明解脫門。

疏五、身智二光、徧覺開化、大充法界、清淨無垢。

福橋光音主水神、得清淨法界無相無性解脫門。

疏六、證淨法界、性相俱絕、德無不見、則大用不亡。

知足自在主水神、得無盡大悲海解脫門。

疏七、衆生不窮、故大悲無盡、滿而不溢、有知足義焉、流止從緣、斯爲自在。

淨喜善音主水神、得於菩薩衆會道場中、爲大歡喜藏解脫門。

疏八、處處見佛、故大喜無窮、喜從佛生、卽佛名藏、若聆泉流之響、無不悅也。

普現威光主水神、得以無礙廣大福德力、普出現解脫門。

疏九、性相無礙之福、故能普現神通、若空色相、膜之流、威光蕩漾。

吼聲徧海主水神、得觀察一切衆生、發起如虛空調伏、方便解脫門。

疏十、調生行廣、如空無邊、用塵暫停、如空無盡。

爾時普興雲幢主水神、承佛威力、普觀一切主水神衆、而說頌言。

清淨慈門剎塵數。共生如來一妙相。一一諸相莫不然是。故見者無厭足。

疏偈中第一偈。前半辨一相因果。次句例餘。後句辨益。初言清淨者。離過無緣故。門如塵數者。隨宜利樂故。以慈爲因。得妙相果。以相爲因。得無厭果。然如來相。有純有雜。此就純門。若以雜門。則隨一相一毛。皆收如來法界行盡。亦相相皆爾。純雜無礙。因果相融。圓成非分。成故。佛一相一毛。卽同法界。無有分量。今此神從一慈門。入無盡相耳。此約十身之相。鈔前半辨一相因果等者。疏文有二。先消經文。辨十身相。後引經論。辨三身相。今初。言純雜無礙。因果相融者。然如來相。亦具四句。一。一因一相。二。一因一切相。此皆純門。三。一切因一相。四。一切因一切相。皆是雜門。正純恒雜。雜而常純。故云無礙。由因無礙。果相亦無礙。故得圓成。非分成耳。以一切純雜無礙之行。成一相故。故此一相。卽同法界。況因果交徹。因中有無盡之果。果中有難思之因。

疏若三十二相之因。但說一相一因。如智度瑜伽等論。涅槃大集等經。至相海品當引。鈔若三十二相下。第二引經及論。說三身相。唯語化身。而總指在餘。智論當三十二。瑜伽當四十九。涅槃二十九。經云。善男子。若菩薩摩訶薩。持戒不動。施心不移。安住實語。如須彌山。以是因緣。得足下平。如篔簹底相。若於父母所。和尙師長。乃至畜生。以如法財。供養供給。以是因緣。得足下千輻輪相。若菩薩不殺不盜。於父母師長。常生歡喜。以是因緣。得成三相。一。手指纖長。二。足跟修長。三。其身方直。若菩薩修四攝法。攝取衆生。以是因緣。得網縵指。如白鵝王。若菩薩。父母師長。若病苦時。以手洗拭。捉持按摩。以是因緣。得手足柔軟。若菩薩持戒聞法。惠施無厭。以是因緣。得節踝臄滿。身毛上靡。若菩薩專心聽法。演說正教。

以是因緣得鹿王腦。若菩薩於諸衆生不生害心。飲食知足。常樂惠施。瞻病給藥。以是因緣。其身圓滿。如尼拘陀樹。立身過膝。頂有肉髻。無見頂相。若菩薩見怖畏者。爲作救護。見裸露者。施與衣服。以是因緣。得陰藏相。若菩薩親近智者。遠離愚人。善喜問答。掃治行路。以是因緣。皮膚細滑。身毛右旋。若菩薩常以飲食衣服。臥具醫藥。香華燈明。施人。以是因緣。得身金色。常光照耀。若菩薩行施之時。所施之物。能捨不慳。不觀福田。及非福田。以是因緣。得七處滿相。若菩薩布施之時。心不生疑。以是因緣。得柔軟聲相。若菩薩如法求財。以用布施。以是因緣。缺骨充滿。師子上身。臂肘臄臄。若菩薩遠離兩舌惡口。嗔恨。以是因緣。得四十齒。白淨齊密。若菩薩於諸衆生修大慈悲。以是因緣。得二牙相。若菩薩常作是願。有來求者。隨意給與。以是因緣。得師子頰。若菩薩隨諸衆生所須之食。悉皆與之。以是因緣。得味中上味。若菩薩自修十善。兼以化人。以是因緣。得廣長舌。若菩薩不訟彼短。不謗正法。以是因緣。得梵音聲。若菩薩見諸怨憎。生於慈心。以是因緣。得目睫紺色。若菩薩不隱他德。稱揚其善。以是因緣。得白毫相。善男子。若菩薩修習如是三十二相業。因緣時。則得不退菩提之心。

世尊往昔修行時。普詣一切如來所。種種修治無懈倦。如是方便雲音入。佛於一切十方中。寂然不動。無來去。應化衆生。悉令見。此是髻輪之所知。如來境界無邊量。一切衆生不能了。妙音演說徧十方。此善漩神所行處。世尊光明無有盡。充徧法界。不思議。說法教化度衆生。此淨香神所觀見。疏第五偈。初言無盡。以顯光常。次充法界。以辨光徧。不思議者。以顯光深。非色現色。非青黃而青黃故。

其第三句是顯光用餘八可知。

如來清淨等虛空無相無形徧十方而令衆會靡不見此福光神善觀察。佛昔修習大悲門其心廣徧等衆生是故如雲現於世此解脫門知足了。十方所有諸國土悉見如來坐於座朗然開悟大菩提如是喜音之所入。如來所行無罣礙徧往十方一切刹處處示現大神通普現威光已能悟。修習無邊方便行等衆生界悉充滿神通妙用靡暫停吼聲徧海斯能入。復次出現寶光主海神得以等心施一切衆生福德海衆寶莊嚴身解脫門。疏第八主海神十法頌脫第三一爲物供佛是等施福德衆寶相以莊嚴身。不可壞金剛幢主海神得巧方便守護一切衆生善根解脫門。

疏二巧隨根欲說法護善使其長成。

不難塵垢主海神得能竭一切衆生煩惱海解脫門。

疏三謂演深廣法體煩惱空梵本偈云一切世間衆導師法雲大雨不可測消竭無窮諸苦海此離垢塵入法門若準此文乃竭苦海。

恒住波浪主海神得令一切衆生離惡道解脫門。

疏四若見佛境則惑亡苦息準現經文三是煩惱四是於苦若依梵本前苦後惑既譯人脫漏致使文義參差故古德云脫第四頌結名既同故知脫第三恒住波浪者卽是普用水爲宮殿。

吉祥寶月主海神得普滅大癡暗解脫門。

疏五以智滅癡。

妙華龍髻主海神得滅一切諸趣苦與安樂解脫門。

疏六爲行所遷一切皆苦。菩提因起則生滅苦亡。便得涅槃寂滅安樂。

普持光味主海神得淨治一切衆生諸見愚癡性解脫門。

疏七將智滅癡未免於見了癡見性。癡見自亡。眞妄等觀是佛境也。

寶燄華光主海神得出生一切寶種性菩提心解脫門。

疏八一切衆生有佛種性。圓明可貴。具德稱寶。佛眼普觀。佛智普示。正音令顯。如出金藏。大心若起。如種生芽。故云出生。緣了二音爲能悟之妙道。鈔正因令顯。如出藏金。卽涅槃經如貧女家中寶藏之喻。

金剛妙髻主海神得不動心功德海解脫門。

疏九了如不取則心不搖動。湛如停海。萬德攸歸。故須彌可傾。魔豈能嬈。一念降魔。如本行集。鈔了如不取則心絕動搖者。金剛經云。不取於相。如如不動。須彌可傾。魔豈能嬈者。卽高僧傳中慧嵬禪師之事。雲林修定有一惡鬼而現其前。有身無首。令禪師懼。公安然不懼。而慰之言。喜汝無頭痛之患。次現無腹之鬼。復云喜汝無五藏之憂。如是隨來隨遣。竟不能惑。魔又化爲天女。云天帝令我以備掃灑。公曰。我心如地。難可傾動。無以革囊見試。天女乃騰雲而去。讚云。大海可竭。須彌可傾。彼上人者。執志。

堅真今用一句義意全同。

海潮雷音主海神得普入法界三昧門解脫門。

疏十入法界定如法界徧。

爾時出現寶光主海神承佛威力普觀一切主海神衆而說頌言。

疏偈文可知。

不可思議大劫海。供養一切諸如來。普以功德施羣生。是故端嚴最無比。  
一切世間皆出現。衆生根欲靡不知。普爲弘宣大法海。此是堅幢所欣悟。  
一切世間衆導師。法雲大雨不可測。消竭無窮諸苦海。此離垢塵入法門。  
一切衆生煩惱覆。流轉諸趣受衆苦。爲其開示如來境。普水宮神入此門。  
佛於難思劫海中。修行諸行無有盡。永絕衆生癡惑網。寶月於此能明入。  
佛見衆生常恐怖。流轉生死大海中。示彼如來無上道。龍髻悟解生欣悅。  
諸佛境界不思議。法界虛空平等相。能淨衆生癡惑網。如是持味能宣說。  
佛眼清淨不思議。一切境界悉該覽。普示衆生諸妙道。此是華光心所悟。  
魔軍廣大無央數。一刹那中悉摧滅。心無傾動難測量。金剛妙髻之方便。  
普於十方演妙音。其音法界靡不周。如是如來三昧境。海潮音神所行處。  
復次普發迅流主河神得普雨無邊法雨解脫門。

照皇明北藏增



疏第九、主河神十法。一行成雨法。若霈然洪霖。滅惑生德。若懸河迅流。無所滯礙。普潔泉澗。主河神得普現。一切衆生前。令永離煩惱。解脫門。

疏二、現身息惱。若泉澗洗心。

離塵淨眼。主河神得以大悲方便。普滌一切衆生諸惑塵垢。解脫門。

疏三、眞實滌垢。慈智相資。若碧沼澄潭。空色交映。故名離塵淨眼。

十方徧吼。主河神得恒出饒益衆生音。解脫門。

疏四、圓音徧益。若崩浪發響。

普救護衆生。主河神得於一切含識中。恒起無惱害慈。解脫門。

疏五、拯救漂溺。

無熱淨光。主河神得普示一切清涼善根。解脫門。

疏六、善根無惑。可謂清涼。若阿耨達池。永無熱惱。

普生歡喜。主河神得修行具足。施令一切衆生永離慳著。解脫門。

疏七、施門無量。令彼無慳。若蘊藻菱蓮。普令物喜。

廣德勝幢。主河神得作一切歡喜福田。解脫門。

疏八、行福契實。故見無不欣。若深湖廣陂。是爲廣德。

光照普世。主河神得能令一切衆生雜染者清淨。瞋毒者歡喜。解脫門。

疏九、方便慧力。雜染皆淨。慈彼冤害。瞋反成歡。若萬頃波澄。光映天下。海德光明。主河神。得能令一切衆生入解脫海。恒受具足樂解脫門。

疏十、總收萬善。令會涅槃。若彼百川。咸會大海。由智海故。名海德光明。爾時普發迅流。主河神承佛威力。普觀一切主河神衆。而說頌言。

疏偈亦可知。

如來往昔爲衆生。修治法海無邊行。譬如濡澤清炎暑。普滅衆生煩惱熱。佛昔難宣無量劫。以願光明淨世間。諸根熟者令悟道。此普潔神心所悟。大悲方便等衆生。悉現其前常化誘。普使淨治煩惱垢。淨眼見此深歡悅。佛演妙音普使聞。衆生愛樂心歡喜。悉使滌除無量苦。此徧吼神之解脫。佛昔修習菩提行。爲利衆生無量劫。是故光明徧世間。護神憶念生歡喜。佛昔修行爲衆生。種種方便令成熟。普淨福海除衆苦。無熱見此心欣慶。施門廣大無窮盡。一切衆生咸利益。能令見者無慳著。此普喜神之所悟。佛昔修行實方便。成就無邊功德海。能令見者靡不欣。此勝幢神心悟悅。衆生有垢咸淨治。一切怨害等生慈。故得光照滿虛空。普世河神見歡喜。佛是福田功德海。能令一切離諸惡。乃至成就大菩提。此海光神之解脫。復次柔軟勝味主稼神。得與一切衆生法滋味。令成就佛身解脫門。

疏第十、主稼神十法。一、功德智慧二種法味。資成佛身。時華淨光主稼神。得能令一切衆生受廣大喜樂解脫門。

疏二、喜樂由於苦除。

色力勇健主稼神。得以一切圓滿法門。淨諸境界解脫門。

疏三、衆生爲所淨之境。

增益精氣主稼神。得見佛大悲無量神通變化力解脫門。

疏四、悲深故通廣。

普生根果主稼神。得普現佛福田。令下種無失壞解脫門。

疏五、下種佛田。必至果無壞。

妙嚴環髻主稼神。得普發衆生淨信華解脫門。

疏六、智敷物信。獲果稱華。

潤澤淨華主稼神。得大慈愍濟諸衆生。令增長福德海解脫門。

疏七、慈眼視物。故福聚無量。慈則恬和怡悅。偈云勝道。

成就妙香主稼神。得廣開示一切行法解脫門。

疏八、以行成佛。故始成卽宣。

見者愛樂主稼神。得能令法界一切衆生。捨離懈怠憂惱等諸惡。普清淨解脫門。

疏九、懈於修習。憂惱是生。勤策諸根。衆惡清淨。

離垢光明主稼神。得觀察一切衆生善根。隨應說法。令衆會歡喜滿足解脫門。

疏十、隨根爲說。遂求故喜。

爾時柔軟勝味主稼神。承佛威力。普觀一切主稼神衆。而說頌言。

疏偈文可知。

如來無上功德海。普現明燈照世間。一切衆生咸救護。悉與安樂無遺者。  
世尊功德無有邊。衆生聞者不唐捐。悉使離苦常歡喜。此是時華之所入。  
善逝諸力皆圓滿。功德莊嚴現世間。一切衆生悉調伏。此法勇力能明證。  
佛昔修治大悲海。其心念念等世間。是故神通無有邊。增益精氣能觀見。  
佛徧世間常現前。一切方便無空過。悉淨衆生諸惑惱。此普生神之解脫。  
佛是世間大智海。放淨光明無不徧。廣大信解悉從生。如是嚴髻能明入。  
如來觀世起慈心。爲利衆生而出現。示彼恬怡最勝道。此淨華神之解脫。  
善逝所修清淨行。善提樹下具宣說。如是教化滿十方。此妙香神能聽受。  
佛於一切諸世間。悉使離憂生大喜。所有根欲皆治淨。可愛樂神斯悟入。  
如來出現於世間。普觀衆生心所樂。種種方便而成熟。此淨光神解脫門。  
復次吉祥主藥神。得普觀一切衆生心。而勤攝取解脫門。

疏第十一、主藥神十法十頌。一、順情則易攝。逆息則難調。故普觀之。

旃檀林主藥神。得以光明攝衆生。俾見者無空過。解脫門。

離塵光明主藥神。得能以淨方便。滅一切衆生煩惱。解脫門。

疏二、三可知。

名稱普聞主藥神。得能以大名稱。增長無邊善根。海解脫門。

疏四、始學者以名爲實賓。大士以名爲佛事。

毛孔現光主藥神。得大悲幢。速赴一切病境界。解脫門。

疏五、以慈善根力。放月愛等光。身心兩病。纔念便滅。鈔慈善根力者。慈善根。卽涅槃第十五經云。復

次善男子。菩薩四無量心。能爲一切諸善根本。下廣說慈心行施。發起大願。竟云。善男子。一切聲聞緣

覺菩薩諸佛如來。所有善根。慈爲根本。善男子。菩薩摩訶薩。修習慈心。能生如是無量善根。謂不淨觀

等。皆從此生。結云。如是等法。慈爲根本。善男子。以是義故。慈是真實。非虛妄也。若有人問。誰是一切諸

善根本。當言慈是。以是義故。實非虛妄。善男子。能爲善者。名實思惟。實思惟者。卽名爲慈。慈卽如來。慈

卽大乘。大乘卽慈。慈卽如來。善男子。慈卽菩提道。菩提道卽是如來。如來卽慈。次廣說慈德。是一切善

法。下廣說慈德。如提婆達多。欲害如來。令阿闍世王。放護財醉象。我卽入慈定。舉手示之。卽於指端。出

五師子。卽便怖畏。舉手投地。敬禮我足。善男子。我時手指。實無師子。乃是修慈善根力故。令彼調伏。廣

說緣起。皆悉結歸慈善根力。放月愛等光。卽涅槃二十經。爾時世尊。在雙林間。見阿闍世王。悶絕躡地。

爾時世尊爲阿闍世王入月愛三昧。入三昧已。放大光明。其光清涼。往照王身。身疾卽愈。鬱蒸除滅。乃至云問者婆何等名爲月愛三昧。者婆答言。有六義似一。譬如月光。能令一切優鉢羅華開敷。鮮明月愛三昧亦復如是。能令衆生善心開敷。是故名爲月愛三昧。二如月能令行路歡喜。此三昧能令修習涅槃道者歡喜。三一日至十五日。光色漸明。此能令善根增長。四十六至三十日。形色漸滅。此能令漸滅煩惱。五能除鬱蒸。此能除貪惱熱。六如月衆星中王甘露一味。人所愛樂。月愛三昧亦復如是。諸善中王甘露一味。一切衆生之所愛樂。是故復名月愛三昧。

破暗清淨主藥神得療治一切盲冥衆生。令智眼清淨解脫門。

疏六。迷理迷報。二愚盲冥。起惑造業。備受衆苦。佛以正法金錍。開其智眼。令明三諦。故云清淨。鈔佛以正法金錍者。卽涅槃第八迦葉菩薩白佛言。世尊。佛性者。云何甚深。難見難入。佛言。善男子。如百盲人爲治目故。造詣良醫。是時良醫卽以金錍抉其眼膜。以一指示。問言。見不盲人答言。我猶未見。復以二指。三指。示之。乃言。少見。善男子。是大涅槃微妙經典。如來未說。亦復如是。無量菩薩。雖已具足諸波羅密。乃至十住。猶未能得見於佛性。如來旣說。卽便少見。是菩薩旣得見已。咸作是言。甚奇世尊。我等流轉無量生死。常爲無我之所惑亂。善男子。如是菩薩位階十地。尙不了了。知見佛性。何況聲聞緣覺之人。能得見耶。澤州釋云。十地菩薩。各修十度。名爲百人。涅槃爲金錍。經初一說。名一指示。中間重說。名二指示。經末復說。名三指示。下合中未見佛性。並如盲人。延公云。金錍喻教。抉膜者。教能生解。喻破無明。卽今疏意。故云正法金錍。而言三指。喻三僧祇。乃至十地。未了分明。故言少見。若準澤州。則涅槃

爲鐔。三說爲三指者。若俱約教。則鐔指不殊。若以涅槃爲所詮者。又不順喻。甯取延公。然三僧祇爲三指者。亦順前示。及與後示。亦順十住少見之言。今不取者。遂令佛說一時之中。不具三指。又以時喻指。以未全同。故疏自釋。以三諦爲三指。指爲旨趣。義甚分明。一時橫觀。皆觀三諦。豎至十住。亦證三諦。第一指者。卽示俗諦。言凡是有心。定當作佛。皆有佛性。二示真諦。爲第二指。云佛性者。名第一義空。三示中道爲三指。經云。佛性卽是無上菩提。中道種子。故非有如虛空。非無如兔角。故知三諦喻於三指。普發吼聲。主藥神。得能演佛音。說諸法。差別義。解脫門。蔽日光幢。主藥神。得能作一切衆生善知識。令見者成生善根。解脫門。

疏七八可知。

明見十方主藥神。得清淨大悲藏。能以方便令生信。解脫門。

疏九無愛見之大悲。生物德故名藏。

普發威光主藥神。得方便令念佛。滅一切衆生病。解脫門。

疏十世醫療治。雖差還生。永滅生德。無先念佛。因病因光。皆是方便。謂佛有無邊相。相有無邊好。好放無邊光。光攝無邊衆。言隨念者。佛德齊均。隨緣隨樂。趣稱一佛。三昧易成。敬一心濃。餘盡然矣。況心凝覺路。闡蹈大方。

爾時吉祥主藥神。承佛威力。普觀一切主藥神衆。而說頌言。

疏頌可知。

如來智慧不思議。悉知一切衆生心。能以種種方便力。滅彼羣迷無量苦。  
大雄善巧難測量。凡有所作無空過。必使衆生諸苦滅。旃檀林神能悟此。  
汝觀諸佛法如是。往昔勤修無量劫。而於諸有無所著。此離塵光所入門。  
佛百千劫難可遇。若有得見及聞名。必令獲益無空過。此普稱神之所了。  
如來一一毛孔中。悉放光明滅衆患。世間煩惱皆令盡。此現光神所入門。  
一切衆生癡所盲。惑業衆苦無量別。佛悉蠲除開智照。如是破暗能觀見。  
如來一音無限量。能開一切法門海。衆生聽者悉了知。此是大音之解脫。  
汝觀佛智難思議。普現諸趣救羣生。能令見者皆從化。此蔽日幢深悟了。  
如來大悲方便海。爲利世間而出現。廣開正道示衆生。此見方神能了達。  
如來普放大光明。一切十方無不照。令隨念佛生功德。此發威光解脫門。  
復次、布華如雲主林神。得廣大無邊智海藏解脫門。

疏第十二、主林神十法十頌一、佛德無邊。皆依智海。含德流光。所以名藏。  
擢榦舒光主林神。得廣大修治普清淨解脫門。

疏二、等衆生悲。是爲廣大。一一離障。名普清淨。

生芽發曜主林神。得增長種種淨信芽解脫門。

疏二、一切勝因。皆爲佛道。各各心淨。則種種芽生。



吉祥淨葉主林神。得一切清淨功德莊嚴聚解脫門。

疏四一切功德莊嚴一毛一一皆然。故佛爲德聚良以佛果攬因。皆圓成非分成。是故一因生一切果。一果收一切因。皆圓融無礙耳。

垂布燄藏主林神。得普門清淨慧。恒周覽法界解脫門。

疏五智通萬法。是曰普門。客塵不生。故曰清淨。悟如日照。頓周法界。功如拂鏡。說智漸明。明是本明。漸爲圓漸。鈔悟如日照等者。楞伽經中有四漸。四頓。今唯用一。彼經大慧白佛言。世尊。云何淨除自心現流。爲頓爲漸。答中。先明四漸。後說四頓。漸經云。佛告大慧。漸淨非頓。一如庵羅果。漸熟非頓。如來漸除衆生自心現流。亦復如是。漸淨非頓。此喻十信二。如陶家作器。漸成非頓。此喻十住三。如大地。漸生非頓。此喻十行四。如習藝。漸就非頓。此喻十向上之四漸。約於修行。未證理。故下之四頓。約已證理。一明鏡頓現喻。經云。譬如明鏡。頓現一切色像。如來淨除一切衆生自心現流。亦復如是。頓現無相無所有。清淨法界。此喻初地至七地二。日月頓照喻。云。如日月輪。頓照顯示一切色像。如來爲離自心現流。習氣過患衆生。亦復如是。頓爲顯示。不思議勝智境界。此喻八地已上三。藏識頓知喻。云。譬如藏識。頓分別知。自心現流。及身安立。受用境界。彼諸依佛。亦復如是。頓熟衆生所處境界。以修行者。安處於彼色究竟天。此喻報佛四。佛光頓照喻。云。譬如法佛所作依佛。光明照耀。自覺聖趣。亦復如是。彼於法相。有性無性。惡見妄想。照令除滅。此亦喻法報。前喻報成。此喻頓照。今疏唯取頓中一日光頓照喻。雖舉鏡喻。非是明鏡頓照。自取拂鏡之喻。正同大通時時勤拂拭。勿使惹塵埃。而後自融通。又上四漸四頓。

多依地位。古今同爲此釋。亦順經文。今釋通於橫豎。則位位之中。皆有頓義。然約橫論頓。復有多義。一頓悟漸修。如見九層之臺。則可頓見。要須躡階。而後得昇。今亦如是。頓了心性。卽心卽佛。無法不具。而須積功。徧修萬行。此約解悟。二者頓修漸悟。卽如磨鏡。一時徧磨。明淨有漸。萬行頓修。悟則漸勝。此約證悟。三頓修頓悟。如利劍斬絲。干莖齊斬。一時齊斷。亦如染絲。一時齊染。一時成色。萬行齊修。一時朗悟。四漸修漸悟。猶如斬竹。節節不同。此非今用。今言悟如日照。卽解悟證悟。皆悉頓也。卽頓修頓悟。功如拂鏡。亦非漸修。是頓修漸悟義。言明是本明。漸爲圓漸者。此融上二。恐人謂拂鏡非頓明。鏡本來淨。何用拂塵埃。故爲會之。此是六祖直顯本性。破其漸修。今爲順經。明其漸證。隨漸漸明。皆本明矣。故云明是本明。卽無念體上。自有真知。非別有知。知心體也。言漸爲圓漸者。卽天台智者意。彼有言云。漸漸非圓漸。圓非漸圓。謂漸家亦有圓漸。圓家亦有圓漸。漸家漸者。如江出岷山。始於濫觴。漸家圓者。如大江千里。圓家漸者。如初入海。雖則漸深。一滴之水。已過大江。況濫觴耶。圓家圓者。如窮海涯底。故今云漸是圓家漸。尙過漸家之圓。況漸家之漸。

妙莊嚴光主林神。得普知一切衆生行海。而興布法雲解脫門。

疏六。知徧趣行。如應布法。

可意雷聲主林神。得忍受一切不可意聲。演清淨音解脫門。

疏七。了音聲性。皆同佛音。故無不可意。能令世間皆聞佛音。方云清淨。

香光普徧主林神。得十方普現。昔所修治廣大行境界解脫門。

疏八、昔行稱周法界。是廣大境。神通普令物見。傲而行之。如下喜目。卽其事也。妙光迴耀主林神。得以一切功德法。饒益世間解脫門。

疏九、衆生諂佞。自不修德。甯有進賢之心。今福智益他。則物我兼利。偈云諛誠。卽諂佞也。佞自不修德者。詩云。內有進賢之志。而無諛誠之心。蒼頡篇曰。諛。謂諂佞也。

華果光味主林神。得能令一切見佛出興。常敬念不忘。莊嚴功德藏。解脫門。疏十、敬念則佛興。佛興則莊嚴得藏。障重者不念不見。於佛豈無常哉。故應見常見也。

